

臺灣鄭氏始末

全

沈雲撰

(國學文庫第十二編)

中華民國二十三年六月重印

927.5

4010

沈雲撰

(國學文庫第十二編)

臺灣鄭氏始末

全

中華民國二十三年六月重印

敘

道光丙申歲余在京師偶從藏書家假得閩人江日昇臺灣紀事本末四十九篇敘天啓甲子歲鄭芝龍倡亂至康熙癸亥其曾孫克塽投誠而止凡十數萬言頗爲詳盡惜體類小說辭不雅馴余因參攷他書刪其繁蕪加以潤色其事蹟年月少有不合者則姑仍之蓋疑以傳疑古人所尙自非身親目接者固未見彼之爲是而此之爲非也書旣成析爲六卷題曰臺灣鄭氏始末并識其緣起於簡端云是年冬十一月德清沈雲自敘

臺灣鄭氏始末目錄

卷一	一
卷二	一九
卷三	三七
卷四	五七
卷五	八一
卷六	九九

臺灣鄭氏始末卷一

德清沈 雲撰

烏程沈 垚註

臺灣懸大海中北界彰化之雞籠城

北在縣極海

南界鳳山之砂馬磯

縣東南二百三

里十縱輪近三千里東背山西面澎湖

島在臺灣縣西五十里海中臺灣廢城在今縣西南

舊稱澎湖

之東爲毗舍邪國或曰昆舍那國袒果睢于習鏢弩宋淳熙閒嘗有酋衆

肆掠泉之水澳

築即永安衛

圍頭

鎮在晉江縣南一百里

等處明嘉靖年都督俞大猷嘗

迫海寇林道乾於澎湖道乾窮入臺不樂其土恣殺番衆以血膏艇棄之

占城而臺地之闢實自鄭芝龍父子芝龍南安人父紹祖爲泉州府胥芝

龍嘗兒戲擲瓦牆外誤中知府蔡善繼冠折左翼趣執既至奇其狀而縱

之長益矯不羈道廣東香山澳傳市舶之日本豔翁氏女年十七暱焉不

反會海澄亡命顏思齊爲甲嬴蓋彼夷所立以統華人者也豐積好施貸與晉江販者楊天生善天生謂日本達閩粵遼句驪得之可以自大轉鳩洪升陳德張宏陳勳等二十八人長思齊而芝龍年少爲之殿日本故於海隘置礮臺列卒更戍因謀閒不意脅殺戍者還礮車內嚮發徒衆縱火板屋乘昏夜襲取要害分奇席卷隱祈天地盟約定天啓四年夏六月將發翁氏婦夢巨魚觸膺生子男也衆往賀因誡芝龍勿疏秘於婦人曰何至是是非夫矣而同盟李英已醉不謹妻倭女王氏覺告而翁氏父翼皇先奔告芝龍曰殆已王兵將至乃速思齊等駛大艇乘風遯已說凡艇十三思齊欲之舟山今定海縣陳德謂密邇鄉土各歸耳難有固志不若風利駛臺灣使僉曰善八晝夜乃至計撫土番立寮寨以時出獵海上時紹祖已

先死其羣從子姓歸者踵接而思齊以五年秋九月獵諸羅山反病死咸薦於皇天后土卜以磁質杯二曰邦伯不祿莫長莫君天庶新造賚一人以又受祐那哉則一俛一印而無小損者從祝已乃次年擲杯衆罔協末至芝龍允如祝衆噩曰盍再乃數十試皆俛印協且完衆謹曰天與之衆庇之矣東六年春正月旬有八日受終芝龍固辭乃就令曰戔戔懼不勝敦顏駕茲弗政曷俾孰綱紀黜賞惟平孰斤農食居者行者咸賴孰司工肆庀廬艦甲兵惟良孰修律度書識別旗表惟察孰肄戰陳進止坐作攻守惟備孰典祭賓飾辭令盛聲容豫占候異條故咸周孰安上下徠豪俊聖邪譎納規誨克均無隱其柬十八人任仔槩予以符旬有八日之應上帝享予咸休其或不享咸劉咸其戒哉命不貳柬不以實受而債不濟者

差罰勿赦柬而身覺不任者讓免芝龍乳字一官至是更焉更其弟芝虎

芝豹芝鳴芝燕餘十三人皆以芝敍二月以楊天生洪升參軍事楊經李

英總饗軍陳勳林翼督造戰艦陳德張宏爲監軍芝龍帥艇十艇各軍士

六十偵事艦二艦各二十五人儲一月糧於三月犯金門

卽浯洲同安縣東南五十里

海又犯廈門

卽嘉禾嶼同安縣中

夏四月犯廣東靖海

在湖之惠來縣

甲子

舊在惠之海豐縣東南一百五十里今陸豐縣東南一百里

二所所設指揮千百戶轄軍士無禦寇者

徒馳羽檄報寇執鋒盛不可當當事悚懼上聞或以蔡善繼嘗善芝龍說

巡撫爲招安計卽起善繼泉州巡海道持撫臣朱欽相檄遣旗鼓黃昌奇

入海芝龍方燁滌戰艇於湄州

在莆田縣東南九十里海中

稔昌奇故亦泉府胥與紹

祖善重不忍違善繼意允就撫而陳德等皆不欲乃別六艇遣還臺灣俟

後命而自與羣從統十二艇衆八百餘人入泉州港謁蔡會欽相疾月餘

不報芝虎因說曰撫臣意不測速去之便芝龍猶豫且重負蔡虎又曰書

生耳弁事體不速將及卽夕駕汐出泊圍頭外灣部羣從厲兵攻海豐下

之又攻嵌頭

莆田縣東
六十里

又連破甲子靖海二所七年春正月還泊漳浦之

舊鎮

縣東
南

巡撫朱一馮檄都司洪先春等會戰於將軍澳

縣東
南

先春還舊

鎮芝龍屯六鰲外嶼

縣東南
七十里

偵先春檄調鎮海

衛城在縣東
北一百里

懸鐘

銅山西
南詔安

縣東南
四十里

銅山

陸隘西南詔安
縣東八十里

六鰲

鎮海
西南

各衛所軍士兼募沿海鄉勇芝豹

夜率二百人持海豐所獲鄉勇旗幟乘岸雜鄉勇中以待越日先春出港

口戰芝虎不勝芝豹起岸上夾擊之先春大敗遯金門一馮卽令金門遊

擊盧毓英會勦芝龍令羣季佯爲商舶並小艇唱漁歌分伏島嶼聞而自

領數艇迎戰毓英少之芝龍復佯敗毓英駛進伏出弓弩齊發遂禽毓英

芝龍以禮遣還屬道嚮者就撫意毓英還廈門謁都督俞咨皋言芝龍可

撫狀咨皋者大猷子也怒責毓英毓英至泉復以可撫狀告知府王猷猷

心是之而咨皋已至一馮所罪毓英失機繫獄更檄千戶馬勝百戶楊世

爵擊芝龍至將軍澳中伏皆死咨皋又檄副總兵陳希范遏戰於杏仔又

敗洪應斗張選舉沒焉咨皋大慚調閩安

鎮在閩縣東四十里

興化永寧

衛城在晉江縣東南

六十里

銅山六鰲縣鐘鎮海金門諸軍將會議中左所

即廈門

芝龍偵諸將惟

王飛熊林盛李夢斗精水戰餘子碌碌不足數乃分十艇爲前鋒分八艇

出青水溝約日中由東碇會分四艇左右翼而自帥中軍六艇策應夜先

發及日遇咨皋軍芝虎鼓前鋒壓之戰林盛李夢斗至日中不決芝龍乘

開橫擊而東碇艇新軍奮起咨皋急麾分敵而諸將誤謂退師遂大亂芝龍縱擊軍將溺失無算咨皋遯入廈門遽令指揮傅珪統十五艇抵禦南

山芝龍至又大敗之咨皋遯三汊河

在舊鎮東北龍溪縣東南

先是朱欽相撫海寇楊

六楊七咨皋實主其議及中左之戰皆率衆先遯漳州工科給事中顏繼

祖劾咨皋希范逮問崇禎元年王猷復以撫議說巡撫熊文燦文燦下巡

道鄧良知議問誰可使芝龍者猷以毓英對卽白文燦自獄中釋之使往

方是時楊六楊七叛烏洋劉香老擾惠潮南澳

在詔安縣西南百餘里饒平縣東南一百六十里海

中有三城去懸鐘澳口三十餘里

褚彩老劫沿海李魁奇攻掠澎湖遼羅等處最橫魁奇

惠安漁人能竟日行水中初聚衆澎湖候劫呂宋國船陳德等回臺灣聞

芝龍受撫不決以衆來會至澎湖爲魁奇所劫德及楊天生等皆死免歸

臺灣者惟李英與通事何斌芝龍聞之大恚秋九月毓英說芝龍降徧賂

當事皆喜遂詐以義士鄭芝龍收復鄭一官奏聞

一名芝龍乳名詳見前

官爲防海

遊擊復盧毓英監其軍芝龍曰世無君子天下皆可貨取耳陳平之閒項

也黃金勝百戰矣二年夏四月芝龍攻殺魁奇於遼羅取其首祭陳德等

盡降其衆六月遂斬楊六楊七於浯洲港

即金門

秋八月褚彩老寇閩安芝

龍追滅之於南日

山在興化府城東百里大海中

三年夏五月遣弟芝燕往日本迎婦翁

氏及所生子而倭婦先未有入中地者不許芝龍命統戰艦數十逼竟上

乃以所生子先歸年七歲芝龍喜其貌偉名之曰森字曰大木能讀書稍

長通春秋左氏傳及孫吳兵法喜擊劍馳射時時東嚮咨嗟念母氏諸昆

弟或有侮之者獨叔父鴻達深器焉事諸母趙氏無閒年十五補南安縣

學生香老寇小埕寨在連江縣東百二十里南接南日山爲連江門戶芝龍擊之遯再寇長樂及海

豐當事以撫芝龍故事遣惠潮分守道洪雲蒸巡道康承祖參將夏之木

張一傑入海招香老需重賂皆被執八年春三月兩廣總督熊文燦福建

巡撫鄒惟璉檄芝龍討之香老時屯甲子脅雲蒸同舟距師夏四月遇於

田尾洋當卽田尾澳外之洋澳在碣石西門外可泊出雲蒸以撼芝龍雲蒸大呼曰當事非夫

我則死急擊勿失香老怒刃之遯是夜芝龍泊赤澳卽赤嶼近南澳計香老必乘

潮至令芝虎芝豹伏衆艦前澳當卽錢澳在潮陽縣東南二十里碣石在甲子西甲子東爲錢澳又東爲赤澳赤澳

近柘林浮水寄旋已而果至大戰至日中芝虎手盾口利刃援登檣巔近香

老大艇躍而過搏將刃之左隊艦未之見也然礮擊大艇虎與香老俱焚

死芝龍盡俘其衆還承祖之木一傑求芝虎尸五日不得大慟徒招以祭

十二年夏六月荷蘭國將郎畢吉里哥連犯閩浙所至莫禦號曰紅夷軍
夷精機巧用火器多奇中乘巨艦曰夾板堅質密護銃礮矢石無所施故
我軍叩攻多敗失芝龍奉檄令芝豹東善泃水軍要瓠笏乘小艇實茅薪
神煙礮石神沙毒火而艇之首腋銳狼牙銳釘相風水執駛抵彼艦不可
拔然火浮水逸因是焚其五艦餘遞去或表芝龍累多前虜於朝且善制
敵乃進總兵再進福建都督鴻逵授副總兵鎮南安贛州荷蘭國王之弟
曰揆一王因郎畢吉里哥敗歸請再舉不許請中占一島地以通往來伺
閒隙乃許揆一王略地至臺灣遇何斌喜甚命爲甲螺度形勝築城於七
鯤身山在鳳山縣西北自打鼓山穿田過港透迤六
十餘里平地中結爲七峯如鯤魚鼓浪故名之首曰臺灣城外列
礮臺更築小城於對岸曰赤嵌城屬臺灣縣十七年春三月京師陷夏五月福

王立於南京以明年爲宏光元年封芝龍南安伯鎮福建鴻逵靖鹵伯充總兵官守鎮江芝豹彩並充水師副將芝龍遣兵衛南京子森入太學說錢謙益以知人善任招攜懷遠練武備足糧貯決壅蔽埽門戶曰少更事知之易行之難曰行之在公等度不能行則去能不我用亦去此豈貪祿位徒事粉飾地邪能將將伊呂一人能將兵虎賁三千足矣不能多益擾衽席閒皆流寇也謙益心畏而謝之

大清順治二年夏四月大軍自歸德道泗逾淮克揚州獲史可法不屈死五月鴻逵以水師守瓜州曹總兵守儀徵距大軍北岸三日大軍分舟師潛由運河達南岸陳於江之西距瓜州十五里絀鴻逵而別以舟師夜濟未至南京福王先率馬士英及衆闡潛遜既至大學士王鐸禮部尙書錢

謙益並忻城伯魏國公等一百五十六大員馬步兵二十三萬八千三百
迎降大軍自徐州進者敗劉澤清高佑於宿遷進清河又敗澤清馬化豹
等於淮黃清三河口入淮安界降范鳴珂進次清江澤清田仰遯走柏永
馥率兵出降遂克淮安鳳陽廬州望風降福王遯太平六月復走蕪湖黃
得功戰死田雄馬得功縛王及妃以獻十總兵并率衆降鴻逵自鎮江奔
杭州潞王監國三日出降紹興淮王渡江降繫周王眷屬於湖州總兵王
之仁率兵二千五百人降擒桂陽王於和州鴻逵奉唐王入福州改元隆
武閏六月丁未日也芝龍鴻逵晉伯爲侯芝豹澄濟伯彩永勝伯鄭森賜
姓朱名成功提督禁旅以駙馬都尉禮從事黃道周爲大學士蘇觀生張
肯堂吳春枝爲尙書侍郎開儲賢館定十二科取士芝龍議自仙霞關外

當守者百餘處所

仙霞嶺在衢州府江山縣南一百二十里有關

先爲不可敗以規進

取又議以明年春出關計戰兵二十餘萬統閩粵正供不足一年之食餉

絀人無固志虛名假義不可以空腹爭也時新進者希樹功以駕鄭氏文

大臣亦疾鄭氏之擅諷隆武趨出關圖恢復芝龍對曰戰危事非策萬全

不可會宴大臣芝龍意侯爵可位文臣上道周曰祖制武臣無右芝龍謝

不敏讓居下而環睹皆鄭氏宿將不平甚芝龍目止之終宴諸生疏言道

周等迂闊無能隆武勅督學御史徧扶之芝龍鴻逵數援引親舊不聽用

意鞅鞅若失尙書何楷劾芝龍引疾不陪祀南郊無人臣禮隆武獎楷好

風裁令掌都察院事鴻逵偶搖扇殿上楷面呵之秋九月大軍克徽州右

僉都御史金聲死之冬十月道周統兵至婺源潰婺源令道周之門人也

給爲內應信之至明堂里爲大軍張天祿所執死蓋洪經略教也何吾騶
曾櫻竝爲大學士隆武擇日親征命芝龍曾櫻留守鴻逵御營左先鋒出
浙江彩右先鋒出江西爲壇西郊行推轂禮鴻逵出城馬仆地隆武方秉
鉞誓師風暴起旗靡天帝及高皇帝前燭滅三軍土色十二月甲申啓行
丙午駐建寧三年春具勒博洛固山額真公圖賴征福建浙江洪承疇經
略如故隆武懼將出汀入贛引湖南何騰蛟爲援芝龍諫止駐延平封成
功爲忠孝伯潞安王瑞昌王以衆二萬人江寧南都改府不克闖賊李自成僞
總兵馬進忠王進才自岳州叛奔何騰蛟隆武封騰蛟定興侯騰蛟率衆
圍荊州貝勒勒克德渾馳破之降自成弟李孜僞磁侯田見秀等馬步兵
五千餘人獲玉璽一隆武賜李錦名李赤心賊號一雙虎自成妻弟名高必正

及進忠進才郝永忠

原名搖旗

張光翠袁應第牛萬才張光璧等十餘營皆隸

騰蛟受節制承疇大索潛山太湖閒殺樊山王朱常采及石應璉等三月

辛未大軍破吉安初汀邵閒有大幅

山名

洞蠻永寧王誘之同據撫州博洛

分軍圍撫時彩軍屯廣信永寧請救遣張家玉以三營往圍解已而大軍

復合夏四月彩聞博洛道衢州將至遂棄廣信入關

岑陽關在上饒縣東南一百二十里東去

浦城縣二渡關在浦城縣西北一百十里

撫州破永寧死彩削爵待罪江西

督師萬元吉自吉安退守張家渡又退守皂口監紀程亮以新威營援師

二百人下守縣津灘壬午新威營潰元吉奔贛贛督師蘇觀生也丁亥粵

遣副將吳之蕃遊擊張國祚以兵五千人援贛庚寅博洛軍至觀生退守

南康是時滇粵先後援贛者累數萬士望北軍皆股慄莫敢一戰乙巳閣

部楊廷麟厲各營兵尙四萬餘人劉廣胤自寧都募二千人亦至皆先後潰五月丙午朔廣胤被執博洛軍抵浙江水澗徑渡數十騎而列戍驚潰走死不暇矣監國魯王由紹興遯舟山肅鹵伯黃斌卿不納會鄭彩至奉之入閩六月鴻逵自浙還浦城隆武疾彩奉魯王并削鴻逵封爵先是魯以都督陳謙使隆武御史錢邦芑以謙與芝龍有舊慮他變請殺之芝龍亟請解官貸謙死隆武故留芝龍語及出謙殊死矣晉江人黃熙允故厚芝龍以洪承疇舉爲福建招討使又謂貝勒曰唐藩弱離鄭氏乃匹夫耳不如給以三省王芝龍使內附乃多爲閒書投芝龍秋七月己巳隆武由關上主事所搜獲勸鄭氏迎降書二百餘緘承疇又僞爲芝龍允獻隆武彩獻魯王書泄之隆武左右鄭氏因人人自危隆武亦惡其不遐棄也日

思遠鄭氏爲全身策成功因以母疾辭還安平

鎮在晉江縣西南六十里

守關將施天

福等知有內變皆撤兵先後去八月大軍破仙霞關獲閣部黃鳴峻等進破浦城殺楊廷清李暄等遂下建寧延平等府庚子隆武奔汀州追騎及之死芝龍時守泉州與芝豹籌餽貝勒兵卒至衆潰翁氏婦初由日本至死焉芝龍退保安平貝勒使郭必昌招芝龍曰我出師平閩浙數月閒悉底就功負一隅何恃速來鑄兩粵總督印待足下緩須臾無及芝龍遂劫衆奉表出降成功叩馬諫曰海內思漢官威儀出於其性無賢愚恥作蒼頭奴李張二賊窮蹙不日死崛起巢穴半書生又所嚮無所得食故忽起忽滅若雲掣電明宗室無伯升昆仲才不足奉隆武執旣孤大抵走死願大人勿虞北人性習與人殊詐利反覆不可信大人設險以守觀釁而動

逸則進勞則退天不厭明擇可立而立之否則終老海濱差可自快弗聽

鴻達諫曰兄位極人臣帶甲數十萬舳艫蔽海糧積齊山以此號召天下

何所不可委身而事自比琉球奉正朔可矣且三省王爵頓易兩廣總督

僞立破兄以此辭不然必悔又弗聽成功泣曰魚不可脫於淵也大人三

思芝龍拂衣起去成功遯歸金門

海自泉江口西南至金門百餘里金門西至廈門百里廈門西南至南澳四百

餘里貝勒遂挾芝龍北去冬十月大軍破贛州楊廷麟萬元吉投水死初隆

武封第四弟

聿鏐

爲唐王隆武死乃浮海至粵瞿式耜等已奉桂王

由榔

監國

肇慶蘇觀生從贛入廣與何吾騶等立唐王廣州改元紹武十一月大軍

破廣州王及觀生自縊死吾騶等降彩由廈門奉魯王次長垣改明年爲

魯監國二年成功自仍隆武舊朔肇慶踰年改元永曆海上遂有三朔

臺灣鄭氏始末卷二

德清沈 雲撰

烏程沈 垚註

四年春正月成功令鴻逵鎮金門芝豹芝鵬守安平而自率舟師泊鼓浪

嶼

同安縣西南六十里
廈門西北多石

魯王以進取福寧興化功晉彩爲建國公熊汝霖

爲相彩季弟斌鎮南伯楊耿鄭聯以兵會長垣封耿同安伯聯定遠伯辛

未周崔芝復海口二月壬申朔克海澄

漳州府東南五十里

破九都

堡在海西

成功令

其叔父香守海澄石尾港癸酉攻漳平不利甲戌福撫佟國鼐遣副將鄒

必科等援海澄而自率師攻海壇

長樂縣東南七十里海口二百八十里

丙子彩克

漳浦越五日辛巳鄖西王朱常彪復建寧其國師王祁復邵武辛卯彩攻

福州必科等來援相拒月餘不克夏四月佟撫遣兵破海口崔芝退保火

燒嶼六月彩攻漳州不克秋七月魯王親率彩等攻福州不克八月成功

會鴻逵於泉州桃花山

晉江縣東三十里

沈佺期等起兵應之泉州提督趙國佐

以兵二千迎戰成功與鴻逵出奇兵夾攻大敗之遂圍泉州而分伏於中

途襲殺溜石寨參將解應龍拔其寨八月丙戌彩乘閒取連江九月己亥

漳州副將王進率騎兵五百步兵千來援聲言潮州兵數萬卽至成功曰

彼出一旅扼五陵

在大盈堡東安平西北

而攻安平則腹背受敵矣乃分兵守薊園

而自營五陵以待進果至大盈

南安縣西五十里

知有備而閒道出南安突泉州

圍鴻逵遣洪政迎戰敗鴻逵遜金門成功退保安平前浙江巡撫盧若騰

進士葉翼雲舉人陳鼎海澄人甘輝南安人施郎與弟顯貴及邱縉林壯

猷金裕先後傳成功冬十月魯王連下長樂永福閩清羅源寧德其大學

士劉中藻別以兵下福寧州十二月魯遣陳世亨復安固不克林荃林汝翥攻福清兵敗皆死五年春正月興化分守道彭遇颺以城降魯二月江西總兵金聲桓遣郭天才援閩養勳慢遇之天才降魯封忠勤伯三月成功率甘輝攻同安守將折光秋棄城走遂授葉翼雲知縣陳鼎教諭桂王使輔明侯林察諭成功遂改永曆紀年還使稱賀以縉等三人守同安而自整舟師趨銅山援粵金聲桓及王得仁用隆武年號攻陷南昌等府逆流攻贛贛帥高進庫故興平伯傑兄子也求援於粵李成棟與布政袁彭年脅佟養甲奉永曆令民解辦會聲桓竝奉表至桂詔封聲桓豫國公得仁建武侯命吳貞毓以吏部侍郎使成棟所浙閩總督陳錦矚成功兵出遣師分攻興化莆田永福長樂建寧等所至皆克凡魯先後復三府一州

二十七縣至是僅保寧德福安二城鄖西王以下死者無算夏五月大軍破聲桓復九江饒州等府六月彩糾李長蛟王國用陳泰鍾萬餘人分道攻建寧遣聯等率散卒藏皂衣白旗分伏各城約期內應秋七月丁卯遣陳鳳藍衍吳豪各以勁卒二百人乘夜突門楊棟黃勝率舟師奪海口約同夜進燒漳州江東橋柵襲破長泰海澄龍溪遂攻同安安溪福寧守者皇遽皆下八月靖南將軍陳泰率大軍屠同安翼雲等皆死進克長樂連江陳泰等自戰彩聯而別遣李率泰等分攻各城彩等衆寡不敵遞出海口大軍遂入興化殺守者顧世臣等永曆至肇慶成棟迎百里外儲黃金千兩白金十萬緡幣稱是備篋頒好予永曆大喜政無巨細關成棟而後受成焉聲桓得仁圍贛三月不克南贛撫劉武元閒師絕其餉乃解冬十

月永曆詔封成功威遠侯辛丑詔養甲代祭興陵

端王後

而密令李元允磔

之江中以貳故十二月惠國公成棟出南安攻贛敗單騎遜六年春正月

大軍破南昌聲桓得仁皆死三月大軍至南安而別將分破南康克信豐

連下撫州建昌成棟溺水死初騰蛟開府于長沙之湘潭是月湖南北十

三鎮先後破湘潭不守騰蛟死大步橋下永曆遣告急於成功遂遣施郎

楊才黃廷柯宸樞攻漳浦守將王起鳳降遂下雲霄殺其守將裴國柱

在漳

浦西南六十里

傳檄浙粵江西王翊起四明

山即天台中大關山

衆萬餘人攻上虞破之蕭

山石仲房會稽王化龍陳天樞台州俞國望金湯奉化吳奎明袁應彪平

岡張煌言上虞李長祥皆應翊遂東徇奉化猝遇大軍奎明嘗之遜翊迎

戰於河泊所大敗之是月大軍克寧德夏四月遂克福安劉中藻吞金死

魯將同時死者董世南等數百人王自沙埕徙南田遣張名振復建跳所

施郎等進克詔安獲其守將姚國泰進屯分水關在詔安東南二十五里分遣黃廷

洪政守羅山嶺宸樞守盤陀嶺漳浦西南三十里以書招潮州總兵郝尙久不從

五月魯告急於舟山黃斌卿不應又使使四明拜翊河南道御史六月又

拜右僉都御史會稽人嚴我公爲魯招顧虎臣及長興柏襄甫皆以衆降

永曆遣胡執恭以侯爵往封孫可望李定國劉文秀艾能奇已誅張獻忠

之四將也執恭旣矯詔封可望爲秦王秋七月詔封成功延平王固辭不

受乃改封廣平公又封李過卽一倭虎爲興國公高必正鄖國公朱由植率衆

攻南贛不克死劉治國等九人自廣東分三路進攻南贛亦不克死是皆

成功檄奉永曆者也八月成功遣陳斌進破遼濠寨在潮陽縣東三十五里霞美二寨

降其守將張禮又令黃山從海靖所破惠來縣以汪匯爲知縣正兵鎮廬
爵守之九月張名振阮進共殺斌卿迎魯王冬十月丁亥自建跳所徙舟
山山西虞允陝西王國賢等皆遙奉永曆年號攻下蒲州及臨晉河津等
府縣旋皆失陷大軍旣克湘潭遂破永興獲總兵尹舉智等李過一名錦
又名赤
心棄辰州遯又擊王進才馬進忠於寶慶又破光山伯劉體仁等十營於
紅江又破衡州進破胡一靖六營於全州彩聯等自舟山還乘閒克復興
化斬其推官黎樹聲十二月焦璉分兵攻全州不克大軍乘勝克道州永
州常寧沅州進克烏撒城及文考洞閣部楊鼇等皆死宜爾都齊等大敗
郝永忠於黎平遂破之七年春正月大軍克南雄永曆自肇慶奔梧州李
元允留守肇慶成功克潮陽縣在潮南一百四十里西
南至惠來縣百六十里知縣常翼風降徵

饜和平不允遣楊才攻破其寨才暴卒而以林勇代攝其衆三月遣施郎
招萬禮於詔安九甲夏四月禮率衆降五月檄高必正等援梧州六月成
功圍潮州總兵王邦俊拒守陳斌斷廣濟橋在城東跨韓江上廣二丈長一百八十八丈戰其將
郝尙久尙久卻乞援於漳州王進進攻羅山廷政敗走進攻盤陀宸樞堅
壁守進以騎兵誘戰而別由閒道出雲霄夾擊宸樞死成功大驚乃解圍
退潮陽時彩聯方據廈門秋八月成功令施郎分兵伏諸島而自設宴虎
坑巖邀聯聯至半山塘伏起殺聯成功佯慟購千金告殺聯者分兵護彩
已而其將陳鳳藍衍吳豪楊棟黃勝各以其衆來附并舊將藍登皆授原
職遣洪政持書招彩彩竟全師付政成功大說九月定南王孔有德軍至
桂林諸將望風遯瞿式耜等不屈死靖南王耿仲明至吉安自盡平南王

尙可喜自攻肇慶等府而碣石守將蘇利閔道急破惠來

在碣石東

盧爵汪匯

皆死成功命輔明侯林察將左軍閩安侯周瑞將右軍定西侯張名振將

前軍平夷侯周崔芝將後軍自將中軍馮澄世潘庚鍾將遊騎策變別遣

閣部揭重熙總兵李安民蕩鹵伯洪國玉分攻邵武等處令洪政約束南

澳銅山諸島掠詔安饒平擇日進取會永曆告急自廣西至速成功道虎

門入

虎頭山在東莞縣西南五十五里大海中有大虎小虎二山名虎頭門外夷入貢及出使要道

冬十月以黃大振守

海壇阮引藍登佐芝鵬守廈門而自帥五將軍之兵抵潮陽聞廣州已破

永曆奔潯州陳邦傳叛劫從官溺死者董英許玉鳳潘駿觀三人而施郎

與陳斌隙又告潮人黃海如將叛去乃陰遣林習山襲殺海如攝其衆遂

攻潮州未下聞重熙等攻邵武戰失利盡焉川湖督羅繡錦等各遣大兵

助可喜十一月福建巡撫張學聖亦分兵擊要害十二月兵解潮州八年

春正月退屯南澳

萬曆四年築城三里左右有灣曰白沙灣

以蕭拱宸爲中衝鎮守青嶼

在南北

令洪政施郎陳璵鄭文星潛軍還守廈門二月次白沙湖

惠來縣西南

抵天星

所敗惠州援兵復惠來城分兵守之聞學聖遣總兵馬得功奪廈門阮引

藍登懼不敵遜芝鵬挾珍寶棄城走成功妻董氏跳海濱僅以舟免而施

郎等出不意截戰得功於員通港得功蹙走鴻逵所舊相得也遂縱去及

成功至則去已五日矣由是與鴻逵隙夏四月改廈門爲思明州以鄭擎

柱爲知州出隆武所賜尙方劍斬芝鵬貶引登秩而重賚施郎陳璵等鴻

逵謝歸命洪旭鎮思明族兄泰鎮金門芝豹施天福鎮安平張進鎮銅山

陳霸鎮南澳距南洋許龍碣石蘇利而自屯金門後浦永曆使宦者劉九

皋報孔有德已先後盡克桂平梧柳四府地靖江王并世子文武臣四百七十三人皆沒上自潯州徙南寧三宮徙田州湖南牛萬才率總兵以下官八十三員兵七千七百降北是月成功以施郎有犯囚諸舟中脫去成功怒殺其父大宣及弟顯貴郎閒行詣蘇茂茂令之安平芝豹所成功捕之急郎遂降北更名琅成功悔曰自此不復安食矣五月成功帥九將軍之兵攻漳浦道南溪在縣西南六登岸副將王進迎戰不利入城堅守環攻之不下六月還思明尙可喜連克雷廉潮惠諸府地秋七月平和人黃梧來附授副將以陳六御爲北鎮領騎兵九月復攻漳浦敗王進於馬口在寨

縣東

提督楊名高統興泉諸鎮兵入援成功親勒六軍藍衍杜輝當前甘

輝余新督中以繼蘇茂郭義伏小盈嶺左楊祖蔡祿伏小盈嶺右陳魁黃

梧彌縫左右翼成功憑高示進退引名高步騎戰嶺下兵交伏發名高突
陳遯泉州漳浦守將楊芝德陳堯策以城降竝授總兵以林其昌守知縣
冬十月永曆徙新寧陳錦遣兵破舟山魯王遯尙書李向中將軍劉世勛
以下死者數十人十二月成功遣乞饟日本以足軍實阮駿自舟山來歸
九年春正月海澄守將郝文興迎成功入遂授文興前衝鎮以黃維璟爲
知縣張名振沈宸荃張煌言扈魯王至金門宸荃艤舟南日山風裂維掣
去失所之永曆徙廣南孫可望遣總兵王愛秀迎至安隆所改名安龍府
周全斌同安人以三策干成功曰大將軍志在勤王當以計閒孔尙吳使
反正檄孫可望李定國分兵川楚連師閩粵一道湖北徑取南鄭窺洛陽
拊其背一由巴蜀搗關中封函谷扼其項一浮長江畫南都遏其饜以虛

其腹此上策也會孫李師分克楚粵巴蜀由黃梅分克太湖潛山德化建昌一趨南贛一趨合肥粵師由南雄會閩師浙師左右之而又分南贛之師道浙浮江分下大江南北而下楚蜀之米以蘇閩浙不時之需此中策也若夫棲兵各島以閒蠶食浙粵沿海諸郡邑陸取南贛汀邵觀釁乘便此下策也成功大說授房宿鎮參軍事遂密表於永曆會孫李進取偵孔尙易防之閩而擗合之而自遣諸將從江東驛在龍溪東四十里至長泰三十里攻長泰戰王進溪西龍溪西敗之二月城未下而總督陳錦援兵大集成功屯柳營江東江東驛水始出峽處錦屯牛蹄山距五里三月錦衆來薄蘇茂林勝逆戰杜輝吳豪橫截其腋大敗之退同安鳳尾山大鳳山在縣北三十里形如鳳翅此其支阜其奴庫成棟受杖怨錦夜剽其首來奔長泰守將李青棄城走遂以馮澄世爲知縣斬

成棟以徇曰此殺主以求利者夏四月以黃廷爲前提督黃山爲後提督圍漳州永曆將陳邦傅殺焦璉以潯州降凡思南慶橫等二十二府州縣皆沒閩撫調金衢鎮總兵馬逢知援漳甘輝請曰錦喪衆洵懼逢知遠來急擊勿失不聽逢知旣入而復圍之數日逢知出戰士皆卻後不能軍王進以師援敗遞巡撫宜永貴潛師攻廈門陳輝擊之遞五月孫可望分道出師李定國下楚馮雙禮副之劉文秀下蜀王復臣副之六月壬寅定國軍武岡雙禮軍寶慶略沅靖皆捷執可乘勝南下而虞有德之躡其後也分武岡軍出新寧寶慶軍出祁陽合趨全州別遣西勝營張勝鐵騎右營郭有名道西延大埠取嚴關嚴關者所由入桂林要隘也雙禮統前軍都督高存恩鐵騎前營王會武安營陳國能天威營高文貴坐營靳統武合

兵八萬先進抵驛湖斬有德騎將李四降其騎卒萬餘遂薄全州定國統
右軍都督王之邦金吾營劉之講左協營吳子聖武英營廖魚標奇左營
卜寧合兵十萬繼進未至全州下定國令急過全州趨關雙禮既下全州
亦分軍會後有德聞驛湖敗急遣精卒數萬援全不及遂急趨關則張勝
郭有名已營關上諸軍皆會戰關下定國驅象陳衝之卻蒼頭鐵騎持重
兵奮突遂大敗之又追敗之大榕江有德急入桂林閉城守諸軍圍之三
日守陴皆潰有德投火自焚死俘其子庭訓及叛將陳邦傳及其子陳師
禹秋七月敬謹親王尼堪統大軍進取寶慶而黔將白文選已先克辰常
殺總兵徐永興以下死者無算壬申尼堪入衡州精騎十萬分將援辰州
定國遣張虎助文選而多張疑兵於河上若爲堅壁不出者壁門左右弁

坑穿帷濠於邊緣以遊騎伏奇兵閒道繞其後夜火象奔衝其堅迫之河上精騎盡覆文秀入蜀初克重慶敘州嘉定諸府州吳三桂親兵逆戰寡敵輒奔文秀諸將多易之既克成都兵益驕弛不設備三桂簡精卒攻破降其衆乘勝復嘉定殺總兵龍名揚遂拔重慶殺總兵李廷明九月定南將軍阿爾津都統馬喇希征廣東冬十月尙可喜耿繼茂兵克欽靈諸州平西王朱聿錕率侯伯總兵李元允張月周朝袁勝等降元允至廣州不屈死尙可喜分兵克梧州成功之圍漳州者凡七月援絕糧竭死者七十餘萬人固山金礪會總督劉清泰統大兵救漳成功攻益急令周全斌禦援兵於龍江之東

城東四十里

四將戰聞礪已潛渡長泰出江東大驚成功解圍

屯古縣黃山率陳鳳等迎礪戰不利成功退屯海澄以郝文興王秀奇守

之還思明州永曆封定國西寧郡王雙禮興國侯三桂破復臣軍於保寧
城下復臣與其將張先璧皆死十二月江西巡撫蔡士英克安福永新阿
爾津馬喇希移征湖廣

臺灣鄭氏始末卷三

德清沈 雲撰

烏程沈 珪註

十年春正月魯王在金門去監國號成功爲樹宗人府正旗月歸芻米三月遣張名振陳輝率兵北上定遠大將軍貝勒屯齊統兵會阿爾津韓岱宜爾德等環攻永州定國遜去丙子進克寶慶辛巳進宿岔口初可望忌定國功高旣封復悔讒人從欲禍之故遜去可望盡收前所復長沙等府縣官印思易置乃皆棄城走南寧鎮朱養恩等數言宜招定國不聽壬午可望統軍自靖州會馮雙禮白文選馬進忠合拒大兵岱等出奇連敗之可望軍不能成列乃乘莫遜入峒口夏四月金礪劉清泰分兵出福泉二港會攻海澄成功遣林察周瑞防海壇

近福港

湄州

近泉港

而自屯海澄王秀

奇郝文興陳堯策守鎮遠寨甘輝萬禮爲援五月察先遭風被執及搏戰礮騎數萬不勝陳魁出奇薄敵營遇伏創甚以甘輝救得免後衝鎮葉章戰死以周全斌代章楊正攝魁軍復振城亦旋裂旋築礮每攻輒爲鎮遠寨所撓亟擊不能下成功令火器鎮何明隧濠下空中實神藥火物勒敢死士持利斧待斫凡礮兵渡濠先登皆遇斫後者火發多斃礮雜散卒遯

漳州秋七月攻鷓汀寨

澄海縣西二十里

鬪陳鐵虎不利師還八月永曆改封成

功漳國公九月郝尙久奉永曆朔據潮州爲尙可喜所困乞援師成功軍至則耿繼茂已破潮三日遂令甘輝等下揭陽以濟軍食十一年春正月命將扈魯王謁永曆不達還駐南澳永曆改雲南爲雲興府辰州爲沅興沅州爲黔興起劉文秀爲大招討督諸軍東伐二月中朝使賚海澄公勅

印招成功成功辭曰士卒散多無土可著願還上勅印便初清泰奉密諭
察奏既至彼稱廈門左右故鄭氏地非它僭竊者比撫臣張學聖道臣黃
澍鎮臣馬得功垂涎金穴乘成功他出潛師襲取悉其家資致鄭逆修怨
索償海疆淪陷命禡三人及革按臣王應元職解京嚴訊都人士又藉藉
道芝龍初居泉之東石有李習者商販日本致累鉅萬無子子芝龍又爲
取日本長崎王族女多載珍奇還東石富甲八閩第宅縱橫數十里每出
遊從人數百衣服麗都若一莫辨疇孰芝龍者崇禎中受撫于巡撫沈猶
龍進珊瑚高尺餘飾珠龍金盃爲猶龍母壽猶龍歎嘖嘖則復進一樹如
前高製生犀黃金爲甲因得結海內魁桀及世家紈袴子云是月成功遣
諸將分攻興化漳泉福州三月親整舟師攻略崇明靖江泰興俘戰艦數

百械數千遂耀武於金山遙祭孝陵而還時尚可喜專鎮廣東耿繼茂移駐桂林定國克復高明圍新會未下都統朱瑪喇會可喜大軍往援夏四月成功命泉人戴捷爲援勦前鎮統三千水師援定國攻潮州破之以定海李孟弼守知府防潮陽惠來六月中朝封芝龍同安侯遙封鴻遠奉化伯芝豹就撫官左都督遣使偕芝龍季子渡齋惠潮漳泉四府備安插兵將勅印撫成功使者見成功戒嚴令先薙髮後接詔成功疑給已也論數日不決使還成功復書其父曰曩歲戊子王裕使上聞父被圍後遂不通一介懼滋累耳歲壬辰周繼武持書來不信先因道路傳聞卒遭不諱故遣李德走探動靜至於和議實非本心自古忠孝不兩全成敗不並立成功何人顧能兼是新朝徒以孫可望李定國成功三人力扶王室往來馳

驟於滇黔楚蜀閩粵贛浙淮鳳蘇松閩犄角執成卒難力服乃以孔尙耿
分藩駐防與三桂爲之竭力而陳錦授首於東有德隕身於西彼復此陷
旋得旋失計以海澄公四府地相餌折鼎足之執孤孫李之援成功方宴
使者報恩寺禮待極隆而使者哨騎四出張皇山谷委詔書於草莽徒曉
曉於先薙髮後接詔甚無謂也天下豈有未稱臣輕薙髮者然諾在布衣
往往出肺肝相示況成功不爲利動不爲害怵磊落作事聞天下一旦苟
且曖昧不特不見重於新朝亦且貽笑於後世矣父寄新朝所謂中流失
船一瓠千金其得延今日者幸也不幸成功亦唯是縞素復仇以結忠孝
之局他何言哉書欲不復黃六表痛哭極陳必得一言以爲信用詳所以
伏維自重秋九月可喜再破定國軍新會圍解成功大練舟師備進取冬

十月漳州守將劉國軒樸世用等以城降官國軒護衛後鎮魏其志火武鎮世用木武鎮張世輝監督知府房星華龍溪知縣周瓊等如故十一月發水陸師十萬應定國漳屬十縣泉屬七縣先後皆降以南靖知縣李奇生爲同知漳浦知縣范進爲通判餘守原官如故十二月遣甘輝取仙遊定遠大將軍世子濟度統大兵至是歲可望出按沅靖諸營由平越道屯天柱十二年春正月輝使陳謙攻仙遊知縣陳有虞守不下洪善穴地實火器裂其城百餘丈遂破有虞死永曆封定國晉王文秀蜀王遣宦者劉玉泛海來告可望與定國不和可望殺大學士吳貞毓以下十八人二月成功置吏戶禮兵刑工六官令思明知州鄧會領儲賢育才二館取士黃帶臣洪初闢等四十人三月應定國師失利還潮州陷夏四月築丙洲新

城

同安縣南四十里城周四里

釋林察臯爲總督與周瑞帥舟師勤王破潮州復之聞

繼茂可喜擊斬總兵廖篤增於玉版泉追敗定國於興業

縣名

分兵克梧州

又連敗之於橫州等處遂分兵攻下高雷廉三府三州十八縣定國遯南

寧

府名

橫州等二州四縣皆陷察次虎門不敢進成功責察觀望命戴臯立

功益以前提督黃廷爲帥萬禮爲副率二十鎮水陸師赴粵命定西侯張

名振爲帥陳輝爲副統二十四鎮入長江前進洪旭爲水師右軍陳六御

爲五軍戎政監其軍中提督甘輝爲總督王秀奇爲副率二十鎮繼進爲

援戈甲燿日鉦鼓闐江夏五月都統石廷柱統大軍爲鎮海將軍駐防京

口定遠大將軍世子統大軍乘虛攻擊總督劉清泰分兵防要害遣使齎

書招成功且言大兵雲集後將無及成功笑不應厚其使而遣之甘輝會

洪旭舟山乘岑江口

即岑港在舟山所西北

守將巴臣功

即副將杞成功

堅壁不戰黃廷入

揭陽港

俗名牛田洋在澄海西南四十五里

屯桃花山潮州總兵劉伯祿駐鷹嘴埔亦堅壁

不出林勝夜囊土填濠進破其壘伯祿遯揭陽普寧

兩縣相去七十里

海澄皆下

毀普寧城以峻揭陽六月芝龍圈禁高牆芝豹戍寧古塔都統伊爾德爲

寧海大將軍統滿漢兵抵舟山永曆將軍盧明臣馮雙禮分攻岳州武昌

劉文秀攻常德寧南靖寇大將軍陳泰及護軍統領蘇克薩哈分徼大敗

之明臣赴水死雙禮文秀遯秦窮追文秀爲定國援軍所敗陳泰死都統

阿爾津代爲寧南靖寇大將軍偕都統卓羅駐防荊州都統祖澤潤分防

長沙成功令兄秦移安平輜重於金門徙泉屬士民渡金廈空府藏墮漳

府惠安同安諸縣城使張英築沿邊礮臺益戰艦從澄世計北兵利陸戰

不利水戰故也郝文興守海澄以林其昌爲知縣遣英義伯阮駿總制陳雪之會名振守舟山烏洋遣李化龍招臣功臣功降授鐵騎鎮改名臣興洪旭甘輝還次台州港總兵馬信以城降授中權鎮爲征鹵將軍秋九月文興卒令王秀奇守海澄冬十月名振軍次定海關在鎮海縣南門外降其守將張鴻德授前鋒鎮十二月世子軍至泉因成功退守兩島復遣招撫不報十三年春正月可喜遣劉伯祿徐有功克揭陽普寧次揭陽城西爲定遠軍犄角黃梧諸鎮軍屯埔上蘇茂欲先迎敵郭遂第止之曰列隊過橋勝則可卻則難退梧曰戰無不勝何退爲茂遂逆戰有功伯祿夾擊大敗之黃勝林文燦皆死黃廷急引軍轉攻伯祿營伯祿反救遂第乃以一軍免諸鎮皆沒浙閩總督屯泰分兵攻舟山台州二月馬信率降將馮用張洪

德謁成功永曆在安龍可望謀劫駕出降定國舉兵敗可望奉駕駐雲南改滇都成功令五軍總制張英督杜輝林勝佐廷禦伯祿軍三月名振卒以陳雪之代遣馬信洪德助駿守舟山堵屯泰軍伯祿絕港爲營徼各鄉之濟廷食者耿繼茂攻定國於南寧禽輔晟伯李先芳斬參將杜紀等定國奔隆安夏四月定遠軍戰艦已具使韓尙亮爲前鋒檄諸軍會戰成功令林順等七鎮屯圍頭陳魁等四鎮泊遼羅泰率舟師爲應萬禮等五鎮分據高崎潯尾皆在海澄縣西圭嶼縣東北及海澄諸港洪天祐張煌言巡廈門尙亮出泉州港順率火輪舟逆之陳濟王明伏走舸鑿其樓船沈溺十數尙亮卻大軍集圍頭順以鐵面軍據上風揚灰火弩齊發大敗之抵暮風雨大作滿漢兵播蕩不能支旣昏雨止風愈暴北艦不能寄棹漂失過半

成功令在廈門俘獲者斷其掌縱還先是有嘉禾斷人種之謠嘉禾即廈門閩諺掌與種似故厭之或說世子曰金門白沙寨爲鴻逵棲隱地出不意攻之可得也金門得則廈門孤矣從之遣王進功潛軍駛往洪旭逆擊順率八鎮軍助之進功潰遯泉州港五月延軍乏食趨碣石攻蘇利利又堅拒不下遂還六月成功以蘇茂輕進覆軍斬之罰黃梧輸鎧甲五百代王秀奇守海澄王元吉爲知縣周全斌爲左先鋒鎮郭遂第爲後衝鎮改名華棟以忠勇侯陳善守思明州初施郎之去也茂縱之至是斬茂諸將以茂功多有後言成功乃贍茂妻子爲文以祭引諸葛忠武斬馬謖以自解悟心猶不自安遂劫副將鄭純及茂弟明知縣元吉殺總兵華棟殲其部衆以海澄降協將康雄不從斷其手得墜城出世子奏梧爲海澄公梧

薦施琅爲總兵蘇明有母在成功所成功亦不誅也康雄張協請速援五

都土城則大兵畢至海澄甘輝等議土城已不可守令康雄林明保輜重

還海門

山在海澄東北

成功擢雄左戎旗鎮明右戎旗鎮秋七月遣黃元佐張進

協守銅山

在古雷寨隔海之西古雷在漳浦縣東南五十里

時以福州無重兵計潛軍閩安襲福

州遂令甘輝萬禮統杜輝等十五鎮北次湄州命戴捷爲嚮道黃廷守廈

門洪旭佐兄泰守金門陳輝統戰艦二十泊南山圭嶼辛亥親帥王秀奇

等奪閩安斬守將胡希孔生擒百七十餘人遂入南臺

亦曰釣臺山在建甌縣南九里去建江

步奪橋

萬壽橋在府南跨南臺江上長三百餘丈

乙卯戰橋北再勝丙辰戰於教場禽延平參

將張禮奪戰馬二十五匹遂圍福州分兵東守烏龍江

即陶江

遏漳泉援師

北守連江嶺遏温台援師西絕洪塘水口

府西十里與陶江通

以斷延建饋運惟南

面近水不爲備築礮臺與烏樓對衝棚幢城巡撫宜永貴急出原任布政

周亮工副將王進於獄中間計亮工謂敵防疏東南當遣田勝李武伏軍

西南遣王進潛師出鼓山後閩縣東三十里轉六通橋徑攻南臺破敵必矣八月

己卯成功分將克連江府東北九十五里而進軍來襲衆疑大兵畢至驚潰成功

不能禁退屯閩安定遠軍偵成功出命馬得功道雲霄八尺門在雲霄城南銅山城

北攻銅山爲黃元所敗走伊爾德敗總兵王長樹毛光佑沈爾序等於大

蘭山殺之連攻定海敗阮思等於衡水洋口辛丑遂連破陳雪之等於舟

山英義伯阮駿陳六御張洪德等皆蹈海死九月阿爾津破永曆將姚黃

於彝陵之蛇退山冬十月遂破辰州土司彭宏澍籍所屬三州六司三百

八十洞戶口降成功禮官陳寶鑰逃泉州納降以黃開泰爲禮官以同安

死難教諭陳鼎子永華有經濟才命爲參軍十二月攻羅源

西南至連江一百里寧

德

西南至羅源一百里

定遠遣阿格商巴都來援成功回思明州甘輝殿阿格商追

至護國嶺輝使韓英劉巧伏兵西北山谷中黃昭伏橋東北魏其志陳謙

逆敵佯敗過橋伏起斬阿格商甘輝還戰巴都盡獲輜重以還是歲芝龍

復遣使勸降復書有曰天下豈有無父之人哉然竊私籌父之禍福安危

孰矣使者重來良非得已成功死辜更復何言乃所以強忍須臾不卽輕

身一擲者徒南望吾君雲天萬里北思吾父喘息重園恐一朝落機阱飽

虎狼爲婦孺之所竊笑負君父重恩靡有旣極耳若論創業明君招攜懷

遠則有道矣漢光武推誠以待竇融唐太宗於尉遲敬德朝爲敵讐暮卽

心腹宋太祖時吳越王錢俶全家入朝兩月遣還羣臣乞留章疏封固賜

之豈不誠恢宏大度能鼓舞豪桀不自己効章章若斯必謂以德服天下
唯唐虞三代獨然與今當事者喜以詐力相尙有初鮮終此成功不幸中
之於先而決之於豫者非謂世澆必不古若亦其性習疑殊也父長者不
樂以不肖之心測當世乃今若此當亦稍稍自悔矣天實爲之嗟何及矣
世子王將軍都統總督巡撫四集褊壤將三載勞苦功高一弄兵於白沙
戰艦蕩沒再弄兵於銅山士卒奔潰舟台先失四將來降巴臣功馬信
馮用張洪德希
孔格商先後授首乃一裨將黃梧叛獻海澄遽封公爵供成功指揮若梧
者累計億千恐盡天下不足封其以是爲能詐邪否邪前者庫成棟弑錦
首來獻成功卽斬以徇爲叛臣賊子戒竊謂天討無私天不變道亦不變
而顧反之以爲教是誘天下以叛也誠不知當事者自居何等且甚危乎

其爲上矣本之不持末焉是議爲天下別順逆斤斤以薙髮爲辭無論古來聖帝明王未有髡完爲教忠孝者卽如姜瓖金聲桓輩孰非薙髮稱順而叛不旋踵殆深奉其教然與教叛膺上賞果以叛爲順與非與夫彼旣從其所好所令矣而又從而誅之示天下爲爭此區區一片土抑何教之未明量之不廣也漳泉潮惠懸海隅誠以畀我完我君臣父子得保一區如殷巢伯周箕子休養生息於其閒彼無此侵此無彼畔使中朝永永無南顧憂成功縱不足見高皇帝於地下然而塗炭生民歲月無已當亦君父之所不忍出此況乎成敗不可必天命不可知也誓日指心有言不再中賜委折拜使黯然丁酉火藥局災十四年春正月永曆自滇都以璽書來問且告議開緬甸爲省以元江土府爲總督不果定遠軍分防泉州大

營高濟烏龍江惠安衛套侯官閩安諸隘成功督舟師北上次三都二月

攻溫州金鄉衛

平陽縣南
七十里

守將翟永壽降三月使萬禮韓英守閩安羅星

塢寨

閩縣東

成功師出鎮下澳遇風還定國公鴻逵卒於金門諸鎮戒嚴夏

四月都統宗室羅託駐防荊州都統伯佟六十駐長沙成功使楊廷世劉

九皋請秦王晉王修好會師進取使施舉李順往浙江遇定海關軍戰死

秋七月成功舟師出興化陳斌盧謙余程守閩安八月抵海門攻黃巖守

將王戎執知縣劉登龍降進圍台州巡道蔡瓊枝副將李必知府齊維番

臨海知縣黎嶽以城降九月天台太平諸縣降令宗維寧說海門衛

台州府東

九十

守將張捷與前所

衛城北
七十里

守將劉崇賢皆降而都統屠泰會總督李

率泰兵破閩安余程戰死斌謙率衆出降亦死成功遣陳堯策守狼崎

山在

閩縣
東

而自回廈門防禦冬十月可望攻定國軍不勝遂率妻子及標下總兵都督等降北初封義王遂以洪承疇統軍會羅託等由湖廣進討定國吳三桂會都統侯黑爾根侍衛李國翰由四川進都統卓布泰會提督綫國安富喀莽吉圖等由廣西進都統濟席哈等隨羅託由湖南進十一月成功師至南澳攻鷓汀壩寨屠之屠泰以舟山不可守遷民渡內地迫之海水之間溺死無算遂空其地成功復分兵屯守招撫十二月永曆使漳平伯周金湯偕廷世九皋齎詔至思明州封成功延平王泰加少傅賜尙方劍便宜行事王秀奇祥符伯馬信建威伯甘輝崇明伯黃廷永安伯萬禮建安伯陳輝忠靖伯洪旭忠振伯餘侯伯印數十付成功頒錫成功率諸將拜受遂進謝表并會師江南疏使參軍徐孚遠隨金湯復命乃設長

史審理典寶典仗典儀典膳諸官以王府禮從事

臺灣鄭氏始末卷四

德清沈 雲撰

烏程沈 垚註

十五年春正月多羅信郡王多尼會平郡王羅可鐸貝勒尙善杜蘭都統伊爾德阿爾津巴思漢卓羅等統兵進取雲南二月延平簡勇士力勝五百斤者爲親軍使工官馮澄世造鐵甲冑試以箭不入又造鐵面繪如神鬼每士一人副二人執斤斫馬足有進無退號曰鐵人以左虎衛陳魁統之三月右虎衛陳鵬敗許龍於南洋俘其衆定國將閻維龍曹延生攻克廣西橫州夏四月李國翰徼定國軍於全州三桂遣兵克重慶成功遣楊廷世詣永曆告師期以薛聯桂爲思明知州楊來嘉佐黃廷洪旭佐泰分鎮金廈鄧會督糧饗五月以中提督甘輝統前軍右提督馬信統中軍後

提督萬禮統後軍成功自統大軍凡水師五萬騎射五萬步擊五萬遊軍策應萬鐵面軍萬猛將數千戰艇數千北上澄海遊擊劉進忠率衆以城降授進忠後衝鎮永曆寶康侯賀九儀遣將曹友攻賓州不克羅託等略下沉靖進克平越鎮遠卓布泰略下南丹那地撫寧各土司進克獨山三桂等自重慶分擊定國文秀軍連敗至水西皆遜遂克遵義別將克開州六月延平軍攻降平陽守將車任暹瑞安守將艾誠祥進攻温州不下秋七月抵洋山山故有龍祠過船必以生羊祭畢卽縱之山上日久孳乳羣隊滿山延平軍士競逐之成功又不致祭天朗波平怪風卒至戰艦自相縱擊義陽王及成功三子睿裕温甲士數千人皆溺旣禱乃息遂還舟山葺戰艦八月永曆仁壽侯譚詣等攻重慶九月象山知縣徐福率父老迎

降延平時有言北將謀叛者成功罷賀世明以姚國泰代又遣張英諭樸世用魏其志李必張魁悉解兵權爲監督世用憤死劉進忠因不自安冬十月率衆奔黃巖海門衛納降周全斌追至海門圍之進忠突圍走全斌不追遂據其城十一月破盤石衛樂清縣西南五十里令諸提鎮就汛休養十二月屯沙關籌餉樂清縣東有白沙嶺東有關即此承疇遣攻水西宜慰司安坤降定國文秀入貴州都統明安達禮俄羅塞臣賽音達禮護軍統領席伯臣車爾布等各統大兵會承疇分劄貴州防禦大將軍多尼會吳三桂卓布泰於平越之楊老堡分三道進攻雲南多尼自桂陽入斬劉將軍於安莊鞏昌王白文選遣將焚盤江鐵鎖橋尼堪軍作浮橋以濟文選拒戰松嶺衛不勝三桂自遵義入攻七星關文選屯兵堅守不下乃轉水西苗界閒道度關

襲其後克之遂進烏撒卓布泰自都勻入抵盤江之羅顏渡口文選遣將李成爵扼險沈其船定國亦率兵來援屯雙河口山頂而卓布泰軍從下流十里取所沈船乘夜潛渡襲斬成爵於梁瑞津遂會諸軍四合張左右翼奪擊定國定國退守陸格樹寨堅拒諸軍以火器圍擊再戰再截定國兵不滿千轉戰四十餘里左右衝突大軍累萬圍數十重而火器熱不可執戈刃交前百不當一定國鼓銳奔之所向騰踐披靡莫敢仰視遂衝重堅奔據鐵鎖橋則已先焚不可據乃從普安間道入雲南三道大軍俱迫滇都定國文選扈永曆奔永昌初孚遠取道交趾入安龍交趾要以臣禮不可阻不得前返廈門後孚遠隱吳六奇所得全髮死其子歸柩松江未葬子亦死十六年春仁壽侯譚詣攻殺其兄譚文脅新津侯譚宏降北封

宏慕義侯詣向化侯分平西王駐雲南平南王駐粵東靖南王駐四川二月延平還盤石衛調兵閏三月癸亥三桂卓布泰等攻永昌壬申定國扈永曆奔騰越三桂等渡瀘江定國與忠勇伯竇名望伏磨盤山左右偵三桂騎至突出截擊幾斬三桂大軍還戰獲遯免而卓布泰八隊合圍名望戰死定國突圍走石門扈永曆過南甸追至定國遣馬雄飛鄔昌琦護鹵簿先趨孟邨而身自斷後又追及定國扈入三宣六慰斬孔廷訓有德子以謀劫降故夏四月辛丑由蠻漠遷河口水陸分進文臣舟從者六百餘人武臣陸從者九百餘人馬亦如之戊申舟次井梗定國遣文選率兵迎駕往啞哇城爲緬人所阻不爲達時距駐蹕處五十餘里文臣侍從皆畏緬人莫敢通文選旣拔營去庚戌舟次沙河口陸行者至啞哇對河距城五

六里屯息緬人疑爲變集衆戰鬪朱蘊金姜承德等死者大半餘亦潰散
延平軍抵崇明總兵梁化鳳堅守不下乘風趨瓜州遣監紀劉澄約提督
馬逢知爲應令馬信黃安蔡文黃昭藍衍率銳師居前周全斌居中甘輝
居左洪天祐居右萬禮居後羅蘊章參伍策變張煌言奉檄傳諭五月辛
酉朔緬王具龍舟鼓樂迎永曆宿衛僅百餘人遂止不出定國書三十餘
上爲大學士馬吉翔司禮監李國泰所沮不報六月辛卯延平軍抵焦山
斬巡江營都司羅明升於談家洲丹徒縣西北六里有沙洲橫列江中以蔡文守焦山丹徒縣東
九里令材官張亮率善泅者斬滾龍鎖前軍先登亮圍瓜州江都縣南四十里江防
同知徐騰鯨遯陳澤追斬遊擊左雲龍於大來橋生擒操江朱衣祚成功
曰此腐儒也縱之蘊章督軍士焚木浮營三寨俘斬數千以劉猷守瓜州

何平理江防事庚子遂泊鎮江南岸前軍屯銀山下

府西二里

守將遙見鐵人

駭甚反走乘之遂破其柵副將高謙出援全斌爲圓陳持盾外向射之不
動火器衝其中忽中分若衢而左右角銳進裏而截擊之奔殪不相顧謙
跳入城全斌遂奪門入謙與知府戴可進等十四員兵衆數萬皆降成功
以謙爲破鹵將軍馮澄世爲常鎮道李徵爲知府林若霖爲理刑丁未荆
州衛糧官來降擢其首爲衛指揮使餘量授千百戶太平府守將劉世賢
遣使迎降加世賢鎮南將軍己酉略取江浦遣羅蘊章分兵守鎮江蕪湖
以降書至遣張煌言守蕪湖韓鏞守江浦儀真吏民迎降持牛酒揚州文
武棄城逃吏民來請遂遣將分守勞民馮澄世潘庚鍾說成功緩取南京
先設揚淮瓜鎮重兵以斷南北饜道扼各路要害以絕外援遣使定國會

師則南京可不勞而定也成功曰定國遯走無處所且萬里援師不足恃大兵分防各省皆數十萬永曆諸將削平大兵凱旋在卽我分兵以守執弱不足當庶神速取南京得形勝守要害傳檄天下反正勤王定國等不召自至南都未得譬諸堂奧空虛何淮揚門戶之有遂使周全斌高謙益兵守鎮江京口楊朝棟招撫江南袁起震徐春招撫江北有陳文達者統戰艦二百餘艘來歸授指揮鄉道使時延平聲勢大振旬日之間江南北相率迎降府若太平寧國池徽州若廣德無爲滁和縣若當塗繁昌宣城寧國涇黟南陵太平旌德貴池銅陵東流建德石埭青陽含山舒城巢沛廬江高淳溧陽建平句容分將撫安若虞不給常鎮淮徐望風引降文武棄城奔走者絡繹不絕而內大臣達索爲安南將軍會都統索洪護軍統

領賴塔等統大兵二十萬來援成功遂進取南京至觀音門

江寧外郭北門三門最西

音曰觀

令黃安總督水師泊三汊河口

三新河口近草鞵夾通口

成功由儀鳳門登岸

出西

從北第一門在三汊河口東北

率諸將觀鍾山形勢祭太祖列宗而還

鍾山在府治東北十五里

令甘

輝余新屯獅子山

亦府名慮龍山

萬禮楊祖屯橋山上洪天祐爲援馬信

郭義黃昭蕭拱宸屯漢西門陳魁陳鵬藍衍蔡祿屯東南隅結水寨劉巧

楊正戴捷劉國軒屯西北隅環山爲營而自帥張英陳堯策王秀奇林習

山等屯嶽廟山與諸鎮營壘雲連勢結首尾相迎巡撫蔣國柱率將士數

千騎薄營余新徼之大敗單騎遁復爲遊卒所禽見成功呼萬歲憐而縱

之郎廷佐管効忠等方議降未決會崇明梁化鳳及參將張國俊遊擊徐

登第等各率水陸兵數千間道至國柱衣祚依化鳳突圍至城下縋而入

與總督廷佐巡城雉東北隅敵營少備聞大兵旦夕將至議出奇夾擊衣

祚曰是有門曰神策

在太平之西金川之東是年因勝成功於此改名得勝

化鳳大喜秋七月貴州

凱旋副都統噶褚哈馬爾賽等由荊州浮江赴援陳魁等逆戰大敗之壬戌都統劉之源統水師數萬與噶褚哈等合擊魁鵬等衆藍衍蔡祿撒油豆敵艦上而衆以矛擗乘之溺斃過半水爲之塞甲子都統哈哈木等統水陸師會戰余新洪天祐分兵拒擊張英林勝督鐵人截攻陸路北帥見矢刃不能傷而斫足競前莫卻駭避入壁水師又爲天祐等所敗延平屢勝兵益驕諸將爭功互相訐成功令非有令擅自進取者不爲功越營爭勝者功敍本營他營非危急不得相救庚鍾諫曰將士奮勇貪功勿苛責以挫其鋒且敵兵已數十萬朝夕益至吾軍止有此數非連營速戰乘勝

合攻不可都城久圍不下或有他虞諸城降納不足守勝則速來敗亦速去爲今日計不如發令諸鎮并力水師爭先取勝以吾所長攻彼所短果能盡覆其水路諸軍殲其渠帥橫江塞隘則陸路軍亦膽落神飛而後乘銳并力靡不濟矣不聽庚午達索等大兵繼至分兵會戰水營而分陸路兵渡江攻擊延平諸鎮各自爲戰勢已不支且北兵蜂集雲奔見勝則進小敗卽退朝夕更代以逸擊勞以飽擊飢以多擊少如是者旬有五日延平士卒日疲器械日敝氣衰糧匱累敗欲崩庚鍾曰勢急矣速令并力自全相機退守以圖再舉又不聽甲申夜化鳳等率精騎穴城出攻余新營北軍夾之遂禽新盡俘其衆連攻拱宸等營連破之及萬禮等奉令來援而化鳳已入城去甘輝及庚鍾諫成功退屯觀音門連營合陳不必待令

爭相救護又不聽乙酉達索統大兵圍擊甘輝張英索洪圍擊林勝陳魁
哈哈木等分取姚國泰楊祖藍衍楊正而水師諸鎮爲劉之源大兵所圍
橋山寨爲賴塔等所圍西北劉國軒諸營爲噶褚哈大兵圍守嶽廟山諸
屯又爲馬爾賽張國俊徐登第據隘環攻成功張黃蓋山上望大兵無不
以三圍一以十并二神器雷轟矢石雨注方急遽不可爲計而郎廷佐梁
化鳳各選精騎表裏合擊鋒銳不可當乃令庚鍾代蓋下指揮自趨江下
整舟師合戰而被所焚溺已五百餘艦觸折滲損無計算急帥周全斌劉
猷楊富冒矢石衝堅力戰拔諸將出排沙嶼瓜鎮已破前降諸府縣守者
多亡失潘庚鍾萬禮張英林勝陳魁藍衍李必魏其志力戰死軍中甘輝
余新被禽亦死收殘卒亡歸者什不二三成功大慟曰悔不用諸將軍言

敗棄若是欲自刎以謝死者全斌及諸將泣諫乃止遂縞素哭祭悲號咽
江躬巡弔卹撫創痍遣使奉表永曆請貶王爵八月次吳淞港遣蔡政齋
書馬逢知所都統劉之源爲鎮海大將軍駐鎮江慶陽王馮雙禮兵敗走
四川德安侯狄三品執之北降授三品抒誠侯濟安伯朱養恩等以嘉定
州降北巡撫高民瞻兵克成都成功攻崇明梁化鳳以礮擊死正兵鎮韓
英監督王起鳳等遂退九月師還思明前使永曆者道阻反命諸將請仍
王號冬十月劉猷往溫州徵饗遇北軍戰沒時安南將軍達索等移兵福
建由溫州進十七年春正月遂抵福州三桂等敗定國軍於普洱奏稱滇
南負固有年一朝戡定獨永曆在緬李定國白文選分屯三宣六慰等處
窺我邊防患在門戶號召諸蠻患在肘腋投誠生心患在腠理請大舉入

緬以靖根株三月安南軍抵泉州會總督李率泰提督馬得功海澄公黃
梧總兵施琅調寧波溫台各水師檄廣東碣石總兵蘇利南洋總兵許龍
饒平總兵吳六奇合兵會勦率泰遣盜持孔雀膽賂成功庖人張德伺成
功宴諸將毒之德以付亨人王回回告其父父曰事主而毒之不忠孰甚
遽挈回持膽報成功遂捕德磔之而厚錫回父以獎其忠改右提督馬信

爲提督驍騎親軍與忠正伯林習山守笠嶼

卽列嶼在同安東南八十里
介廈金門之中周二十里

輔明侯林察總督水師與中衝鎮蕭拱宸屯崇武

所在惠安東南泉州

禦泉州兵

夏四月安南進泊圍頭卽令察等屯劉五店

在同安東

少傅泰與護衛左鎮黃

安守金門城仔角五軍戎政王秀奇督右虎衛陳鵬殿兵鎮陳璋守五通

高崎

五通嶺在同安東南七十里高崎在五通之西
鼓浪之東廈門之北雜浦嶼之東南多大石

前衝鎮劉巧後衝鎮

黃昭左衝鎮郭義援勦前鎮林明屯同安港逆戰閩安侯周瑞忠靖伯陳

輝護衛右鎮鄭仁援勦右鎮林順泊南山麓遏海澄兵前提督黃廷右武

衛周全斌統蒙衝二十載火物而帷之伏後閒發英兵鎮陳瑞護王侯伯

以下細小過笠嶼金門而空厦島成功督五府陳堯策等於鼓浪嶼厦門西北

海澄指揮號令忠振伯洪旭屯鎮海旂尾往來策應即岐島大武口高千

里爲鎮海衛在厦門西南癸丑夜陳鵬約率泰兵出高崎當迎應飛渡厦

門率泰喜諾五月乙卯朔梧潛師出海門成功遣堯策約各鎮聞礮起椗

堯策到周瑞船而海門師大至不及他去礮擊瑞船堯策與瑞俱死陳輝

督衆鑿戰負重創索洪進同安港海門在鼓浪西同賴塔鼓温台水師攻

高崎率泰前進應鵬達索施琅統大軍繼至成功手旂劍問左右流平否

曰平矣曰平則潮轉風隨令發礮火艇雍上流壓大軍兩岸轆轤競轉竹
緝貫沈樹大起鵬約親軍爭登岸應敵而副將陳蟒性直不可通故大呼
發礮擊敵陳璋奮軍鉤遠斧近擲瓜礮敵軍蹂踐淤淖鵬愕然計左則
亦麾衆助戰率秦落水逃免達索戰艦絃銳枝半皆沈覆施琅以小舸援
達索閒道遯成功令何義代己而自乘飛艇督諸鎮合戰索洪泰帥水師
鎮蔡叶吉由浯嶼進發截温台鬪艦黃廷等縱火於鼓浪嶼後夾攻賴塔
風起潮湧煙燄漫天馬信督神弩軍圍梧全斌復以竹罌洋礮橫擊之梧
兵盡覆索洪賴塔皆棄軍逃竄北軍奔殲焚溺死者以億萬計水爲不流
成功知鵬有變密遣洪旭往勞伏勇士焉鵬喜未泄與旭飲歡甚引鵬送
江濬勇士突起縛鵬部衆大譁得陳璋程應璠曉之乃定成功責鵬交通

狀伏臯遂磔以徇時吳六奇遣將馬嵩至潮爲刺客所殺許龍蘇利聞大

軍已敗退還逃帥達索等皆以馬得功軍獲全得功屯黃崎

惠安東北

不進故

也成功厚卹周瑞等擢陳莽右虎衛何義左虎衛陳璋宣毅左鎮俘獲軍

實分賚諸將士舉之數月不盡六月尙書車克納都統索渾統大軍會福

州秋七月耿繼茂移駐福建都統宗室羅託爲安南將軍會大將軍達索

等相機進勦成功使張光啓如日本乞師八月議棄舟山地明安達禮率

滿兵還京內大臣愛星阿爲定西將軍征李定國九月李率秦奏遷同安

之排頭海澄之方田沿海居民八十八堡入內地安插成功因議取臺灣

招沿海之不願內徙者屯田其中以益軍儲冬十月魯王卒成功與兵部

侍郎王忠孝禮葬之金門後浦十一月光啓使還言日本上將軍不允發

兵助銅噴鹿銃倭刀爲備十八年春正月成功集諸將議曰吾聞臺灣北
自雞籠南至浪嶠千里而遙東自多羅滿西至王城千里而近風便自雞
籠淡水趨福州港口五更可達自臺灣港至澎湖嶼四更可達

海道不可
以里計舟

人分一晝夜爲十更
故以更計道遠近

澎湖至金門七更可達東北至日本七十更可達南

至呂宋六十更可達中多大溪流入海水澹曰澹水洋雞籠名東番亦名
北港有數十社社大者戶數千社小戶數百俗習走過奔馬土宜五穀竹
數拱長十餘丈其鏢鎗竹鐵簇試鹿虎輒中後避倭難稍稍居山後我太
師初闢臺灣事耕植通商販密邇漳泉地廣而腴至今爲紅夷所據屹然
一大部落我將復之以裕兩島進可戰退可守況茲遷民播棄失業者多
招之以耕以戰兵食兩足良計之得也已而臺灣甲螺何斌持地圖來獻

遂檄南澳陳霸備許龍蘇利參軍蔡叶吉佐少傅泰守金門郭義蔡祿往

銅山協張進防禦洪天祐陳輝楊富楊來嘉何義守南日湄州崇武圍頭

防護金門

金門東北至圍頭又東北至崇武又東北至南日

洪旭黃廷王秀奇杜輝林順

陳永華及其兄子繩武馮澄世之子錫範等佐世子經守廈門而自率弟

龔及馬信周全斌蕭拱辰黃昭等數十鎮東征二月次澎湖巡視三十六

嶼

澎湖島在臺灣縣西大海中西與金門相望東至府城五十里三十分六嶼泛若水中之鳧其最大而居中者曰大山嶼縱橫三十餘里

將守之曰此臺灣門戶是矣諸將軍唯寡人鷓首是向勿以紅夷礮爲疑

抵鹿耳門成功曰此古所謂落漈與

深者水趨下不回也

使測水深丈餘額手謝曰

天興我也潛軍循圖委折至赤嵌城登岸斌曰速據倉廩乃以兵進不然

遽則燬矣從之守赤嵌城酋長苗難實丁遣何機走鯤身請援成功令諸

將持神器傅城遣通事吳邁說曰不速降皆灰燼矣苗難實丁懼以衆降成功厚賂之令說揆一王曰臺灣吾故物久假當歸而揆一王已遣酋長英黎三來禦道遇何機機謂唐兵實由天下非傾國以赴不可還請濟師成功因得整軍速進徑抵臺灣令黃昭伏鯤身尾楊祥繞出鯤身之左擊其虛而奪之蕭拱辰以水師截其夾板皆伏以待全斌速伐大竹環布革若城多張旗幟鉦鼓飛卒譟誘而內穿坎焉蓋紅夷專恃火礮鎗銃無他長登高遙望發大礮轟擊城則偃而復起屢擊屢起遂盡挾鎗銃噴弩前趨奮擊楊祥自後突起昭三面蹙之紅夷軍全覆坑陷中而成功速兵奪門火器奔下不獲前士卒傷乃退於七鯤身壘土石環濠以自衛是月白文選密遣緬人齎表永曆議要緬王送駕出已作浮橋距行在六十里將

渡以馬吉翔李國泰撓阻不果行夏五月改赤嵌城爲承天府楊朝棟爲

府尹置天興

在今臺灣縣東四十里

萬年

縣東南二十里

二縣以祝敬莊文烈爲知縣黃安

顏望忠等率師繼進授安爲右虎衛招沿海居民之不願內徙者數十萬人東渡以實臺地初黃梧豔沿海多富商大賈勸率奏遷海澄內地民皆破產哀號自盡至是爲成功所招梧由是吞嚙莫遂大怨成功與施琅計閒成功守將銅山北自金石接浯嶼南自梅嶺達廣東西南接元鍾所較諸守者爲最要郭義蔡祿初約萬禮爲兄弟及禮死江南之役還祀忠臣廟中首甘輝次禮復覈禮實逃軍後溺死遂撤不祀因懷不平六月祿遣將陳華羅棟揚言南洋許龍兵將至分據要害劫忠匡伯張進欲俱降梧進佯諾密與呂簇圖義祿不獲進自焚死世子經聞變遣黃廷洪天祐

陳霸合討義祿遂大掠城中與察言司薛聯桂等由八尺門納降達索等
統大兵至則洪天祐黃元益兵守銅山不敢進又恐成功自澎湖奪福州
乃還梧以招撫都督萬儀萬祿等奏入而急與尙書蘇海納劫掠沿海居
民塗炭殆盡秋七月土番阿得苟攘聚衆欲救紅夷楊祖與戰敗死成功
令黃安陳瑞設伏誘斬之躬巡田野慰撫諸社寨酋長及新遷居民令皆
按堵樂業益繕甲兵堅城守揆一王自是閉城堅拒無所得食八月梧會
蘇海納統兵間道毀鄭氏祖墓盛其屍置獄中而芝龍及子世恩世蔭等
以冬十月無少長皆棄柴市十一月成功令陳廣等焚紅夷夾板黃安率
衆自鯤身合攻揆一王勢蹙遣通事李仲說曰此去荷蘭遠不可久駐約
自倉庫外金玉珠寶悉載歸遲將莫及揆一王與諸酋長如約還荷蘭成

功祭告天地山川置社稷宗廟學校改臺灣爲東都

今縣西南廢城

城曰安平

是月三桂愛星阿會師木邦晉王李定國奔景線鞏昌王白文選遯據錫

波江大軍造筏將渡文選復奔茶山爲總兵馬寧等連敗至孟養文選降

封承恩公三桂愛星阿進攻緬城十二月戊申緬人請移蹕皇太后皇后

皇太子同行夜渡河三桂等遂執永曆

由

榔殺華亭侯王維恭等一百餘人

越年定國在景線病死成功殺朝棟及敬爲刻減兵糧故以鄭省英爲府

尹令黃安城守撫衆周全斌總督承天府南北路分地開墾圍生牛而教

之耕鄉仍曰社田仍二十五戈爲一甲三年然後定賦限溝渠時畜洩毋

聽民兼并買賣察舉孝弟力田及有奇才異能者試用諸將以時簡肄武

備嚴守望緝姦宄如律

臺灣鄭氏始末卷五

德清沈 雲撰

烏程沈 堯註

康熙元年春正月成功聞冢兆慘發父被族誅擗踊大哭帥諸將以下皆
縞素二月命洪初闢等分理社事成功切齒梧等未及報病肝急或告南
澳陳霸有貳心卽遣全斌往擊霸聞之曰辨無及矣中梧等姦計不自察
卒以兵逼如是而往衆畔親離無日矣豈掘冢之應墮地若斯雖然霸不
忍爲梧用也乃率諸將遯粵東去全斌獲其子士鼇復命以杜輝代守南
澳夏四月兵部司務林英奔告緬事諸將請更朔號成功曰不可傳聞異
辭審而後發喪擇立宗室之賢者乃改元朔諸將以爲然初世子經取尙
書唐顯悅女孫爲婦不相得私於其弟之乳媪陳氏生男詭謂侍妾出者

告成功諸王及邑之大夫皆賀而顯悅責成功書謂禮有八母乳母居一世子與狎當何辜成功暴怒卽令都司黃毓與少傅泰斬經及陳媪及所生男并斬夫人董氏以理內不職也諸將大駭莫敢諫少傅與毓議殺陳媪及所生男而諸王以下合表爲夫人世子請遂以兩級付毓報成功成功愈怒解所佩劍促毓詣少傅少傅令遂見經經拘毓與衆議未決而參軍蔡鳴雷在臺行多不法恐見誅奔愬經所已密諭全斌等將至矣令必盡誅乃已洪旭曰世子不可以拒父諸將不可以拒君唯少傅兄可以拒弟遂告少傅趨林順統舟師守大擔

嶼在廈門前同安縣東南八十里

會全斌征陳霸還

黃廷勸世子出不意執之使黃昌攝其軍成功聞諸將拒命憤甚遣洪有

鼎馳諭全斌有鼎至銅山聞全斌被執不敢前五月癸酉朔成功病強掖

黃安登將臺望澎湖有船東至否安曰無之梧琅姦計北旣赤族又將滅是中葺事隱安見顯悅非爲梧賣者願王勿疑疑則左右皆義祿霸等父子至親且若是它更何以自處成功益忿怒狂走越八日庚辰嚙指而卒年三十有九弟襲與黃安馬信遣人奔赴金廈信慟哭不絕死衆將請襲權政爲鎮撫計而蔡雲李應清曹從龍張驥謀遂奉襲告黃安安持不可又說黃昭握重兵擁戴昭諾遂與蕭拱辰合謀拒經而襲弟成賜潛軍往廈門道遇許龍兵被執繼茂率泰遣使招經經請比朝鮮行事秋八月使再來令先繳所陷州縣印卽爲奏請經與泰等議曰先王甫荒東土不幸卽世內靡有定其何外侮之能膺懼而受撫則無以見吾先王不受又左右無以應敵不如姑受令焉以緩須臾乃使楊來嘉上州縣印十五率泰

遂送來嘉北上且揚言鄭泰洪旭黃廷等將密獻兩島入奏以閒經心經竟以兩島屬少傅加全斌爲五軍都督率以東征冬十月抵澎湖先遣鄭

斌至安平告諭諸將面視莫敢言獨黃昭等拒命遂進師西嶼

澎湖三十六嶼之正

西嶼昭率兵守寮港曹從龍守安平礮臺蕭拱辰守洲仔尾張驥自鹿耳門

蔡雲李應清自赤嵌城合兵拒戰全斌說經乘大霧登岸背水列陳驥等

聞水聲人語呼譟縱擊經軍卻全斌呼曰卻則溺矣諸將奮死前戰潰驥

陳而昭等合師來援昭先中流矢死衆亂反走遂乘勝進日中霧散全斌

持旃周呼曰世子至矣黃安率諸將倒戈來迎經免冒籲衆出矢言令鄭

斌勞襲至則待之如初斬拱辰等五人餘不問偶於黃昭營中得少傅泰

與昭書令奉襲拒經而自據金廈云經秘之初不意爲繼茂等反閒也十

一月經與全斌巡南北路十二月來嘉還思明洪旭令仍守崇武遣使告經二年春正月經使顏望忠守安平黃安督承天府南北路而自率全斌等還思明卽王位稱永曆十有七年諸將皆賀少傅泰稱疾不至遣鄭斌視疾還或言來嘉北使還與少傅往來密甚三月王鐵佛等攻延建率泰會梧等往勦而梧將有以海澄來獻者經密令諸將整師泰疑爲圖己也載妻孥出泊港口或勸泰出降泰曰先太師誤矣泰豈再誤己而知海澄有備經不果行經與全斌謀鑄金廈總制印遣鄭斌吳慎齋赴泰所言經已決意東行兩島唯伯父總制泰喜受命然未敢躬往稱謝其弟鳴駿謂曰骨肉至親土地重寄又何疑焉泰意稍解夏六月經使劉國軒護輜重東渡鳴駿力勸泰見經經與之語及成功相持慟哭且諄屬經理兩島事

越日置酒邀泰酒半經擲杯左右縛泰出與昭書示之泰急切不能自明遂縊殺之遣全斌籍其家鳴駿及泰子纘緒陳輝楊富何義楊來嘉蔡鳴雷等文武四百餘員海艦二百餘艘士卒數萬奔泉州納降封鳴駿遵義侯纘緒慕恩伯餘各授職有差秋七月和蘭揆一王遣通事李瑞乞師於繼茂率泰攻兩島復臺灣故地乃集衆議或曰紅毛古不通上國萬曆間嘗駕大艦攜巨礮薄香山澳求互市不得海澄奸民李錦引據漳南澎湖嶼侵奪臺灣地築室耕田其中天啓初掠漁舟六百餘艘役華人運土石築城尋犯廈門泊舟風櫃仔出沒浯嶼白坑東槌莆頭古雷洪嶼沙洲甲洲閒海寇李旦等復爲之助海警戒嚴崇禎中爲鄭芝龍所破不敢窺內地者數年十年駕大船由虎跳門薄廣州主奸民李葉榮交通總兵陳謙

爲居停出入爲兵科凌義渠所劾坐逮訊奸民知事不成復引番入據臺灣鄭氏奪復故土而今引紅毛克鄭氏若據臺灣要互市以閒寇掠閩粵閒誰復承其咎也率泰曰誰復爲百年計功曷目前事耳吾聞紅夷去中國絕遠其巨舟長三十丈廣六丈厚二尺餘樹五桅後爲三層樓旁設小窗置銅礮桅下置二丈巨鐵礮發之可洞裂石城震數十里世傳紅夷礮卽其製也柁後置照海鏡徑數尺能照數百里其人悉奉天主教所役使名烏鬼入水不沈走海面若平地然以舟大難轉其人又不善戰故再爲鄭氏所敗今若資其所長先進以挫其銳繼以新降將士俾力戰以樹功而我以大兵承其敝蔑不濟矣乃允揆一王爲前鋒使提督馬得功督降將卒數萬繼進經遣全斌督林維等分禦諸隘陳昇守高崎黃廷道南山

林順道遼羅策應經自率洪旭王秀奇等屯大擔笠嶼冬十月全斌分諸將引戰紅毛巨艇於沙淺處焚之過半焉得功來援溺水死林維等追敵及海門爲琅將守備汪明等所徼戰死繼茂帥總兵王進功等截戰於雲霄鎮全斌敗卻聞陳昇已降梧高崎失守衆益潰敗琅統大兵擊廷等不利復會紅夷夾板以大礮轟擊廷軍大敗琅遂乘勝奪廈門順等聞昇已降不敢出戰琅梧合兵進擊斬千餘級遂取浯嶼金門墮城郭俘寶玉繼茂遣人至銅山招經又遣人告洪旭等有執經獻者當封爵比海澄公守泉州旭謂經曰勢急東渡否則變生肘腋柰之何經乃遣心腹護孥屬先行且諭衆文武其不願東遷者聽十二月蜀中晉王朱宗蕩及郝搖旗等皆敗繼茂遣將克長腰東蚶二島永曆兵部尙書阮春雷左侍郎張煌言

僅以身免三年春正月琅遣招林順舉衆降二月南澳守將杜輝率衆赴揭陽港納降寧靖王瀘溪王魯世子巴東王諸宗臣及故臣王忠孝辜朝薦沈佺期郭貞一盧若騰李茂春等從經東渡馮澄世舟至東槎爲其僕所殺若騰卒於澎湖經自往祭以洪旭言於澎湖姥祖宮左右分營立壘中置礮臺令薛進思戴捷林陞守之四閱月而代三月甲子周全斌質其子於李率泰而自率將士數萬從鎮海衛納降丁卯率泰會繼茂王進功黃梧統兵至廈門都督將軍翁求多率將士六萬降丙子夜半渡海進拔銅山降永安侯黃廷都督余寬以下及兵民三萬餘口遂盡驅沿海居民入內地築牆爲界縱軍士大淫掠殺人山積海水殷然夏四月經改東都爲東寧升天興萬年縣爲州設澎湖及南北路安撫使諸將分守土地庶

事悉委陳永華崇尙儒雅與民休息而兩島遠近棄兵民衆凡四五十萬
秋七月福建提督水師總兵官施琅爲靖海將軍進攻臺灣遇颶風還八
月浙督趙廷臣遣將由懸山花嶼乘漁艇入小港繞山後突入帳房禽煌
言及其黨衆得視師兵部銀方印一關防九七年春明珠蔡毓榮與李率
泰俱至漳州使興化府知府慕天顏持書招撫經仍以自比朝鮮爲請遣
柯平葉亨入奏不報十年夏耿繼茂子和碩額駙耿精忠襲爵爲靖南王
十二年春平南王尙可喜疏請歸老遼東秋七月平西王吳三桂靖南王
耿精忠並疏請撤藩八月尙書梁清標等分往雲南廣東福建經理撤藩
事宜十一月丙戌三桂拘經理侍郎折爾肯等殺雲南巡撫朱國治自稱
天下都招討兵馬大元帥以明年甲寅爲周王元年總督甘文焜自殺貴

州巡撫曹申吉提督李本深以下皆應乃停撤平南靖南二藩梁清標陳一炳召還削三桂爵十二月甲子偏沅巡撫盧震棄長沙逃沅州總兵崔世錄被執十三年春正月四川巡撫羅森提督鄭蛟麟總兵譚宏吳之茂以四川降二月常德總兵楊寶應知府翁應兆長沙副將黃正卿及澧州守將並以城降廣西將軍孫延齡殺都統王永年副都統孟一茂等執巡撫馬雄鎮以叛三月耿精忠以福建反總督范承謨死巡撫劉秉政降約經統舟師徑取南京與三桂爲鼎峙經告藉漳泉地以募軍士精忠不許鄖陽副將洪福以所部叛襄陽總兵楊來嘉據穀城叛並遣使告經仍用永曆正朔夏四月湖北總兵蔡祿謀以兵應來嘉不克誅死潮州總兵劉進忠以城降精忠與續順公沈瑞兵巷戰大敗之遂引兵據守三桂子應

熊孫世霖誅死延齡削職精忠削爵經遣馮錫範劉國軒帥師徇漳泉屬
縣五月經至廈門同安知縣鄧世茂來迎海澄總兵趙得勝同安副將張
學堯遊擊花尙蘭皆叛精忠來降授得勝左提督興明伯學堯侍衛將軍
泉州兵逐精忠守將王進殺總兵賴玉來降五月平陽兵執總兵蔡朝佐
與精忠將會養性合圍瑞安六月總兵祖宏勳以溫州叛羅清黃巖太平
諸營相繼叛延齡寇柳州精忠遣李連李秦攻建昌杉關柯昇叛廣信以
應精忠甲辰經入泉州以前提督王進功子藩錫爲指揮使何可化爲提
刑道王者都仍守知府事郎中周襄緒等招諭精忠而尙可喜攻進忠潮
州甚急精忠將李雲龍張雄攻常山開化爲金華副將牟大寅所敗雄死
乙卯進忠稱臣求援經授進忠右提督定鹵伯遣陳天祐金漢臣救潮駐

軍南門外鳳皇洲

一名老鴉洲

可喜出不意來攻天祐等俱戰沒秋七月南瑞

總兵楊富叛應精忠事覺伏誅精忠遣將克石城遂攻寧都爲遊擊周球

所敗進忠遣將據程鄉縣旋爲官兵所破精忠將闔標攻金華爲將軍喇

哈達所斬精忠合兵圍衢州八月又分攻處州金華龍游仙居諸暨新昌

寧海象山餘姚遂安嵎縣進忠將劉斌克據普寧海澄公黃梧率子芳度

降精忠已而復叛殺其將劉豹等三人固守漳城黃巖總兵阿爾泰降精

忠三桂兵陷徽州祁門歙縣可喜遣人招進忠不受斬進忠副將陳璉等

九月精忠將王進攻泉州經遣國軒大敗進於陳潼關

仙遊縣南接惠安界

白水駟

惠安北五十里

乘勝偪興化別以馮錫範趙得勝爲左右提督攻漳浦降其總兵

劉炎授前鋒鎮定鹵將軍精忠懼使張文韜詣泉州請和以楓亭爲界

仙遊

東南五十里東北去府城六十里東南去惠安五十里許之來嘉兵攻南漳敗三桂兵攻袁州精忠

兵據建昌廣西提督馬雄總兵郭義隆降三桂冬十月進忠乞援國軒分
兵營新墟與可喜相持潮州圍解十一月三桂兵守七盤朝天諸關官兵
餉絕退屯廣元來嘉克陷竹谿中鋒寨十二月癸巳陝西提督王輔臣兵
叛寧羌經略英洛遇害大將軍貝勒董額退保漢中延齡兵攻懷集欽州
給事中蘇拜往招輔臣十四年春正月精忠將黎化中與三桂兵合攻連
州乙酉興安兵變殺總兵王懷忠三桂兵據廣元朝天諸關鄂秦統盛京
大兵防守太原精忠將沙有祥據桃花嶺克處州輔臣兵陷蘭州巡撫花
善奔涼州二月經遣何祐攻饒平獲續順公沈瑞歸授懷安侯三月來嘉
攻南漳爲總兵劉成龍所敗畢力克圖統大兵拒輔臣於大同輔臣兵連

陷定邊花馬池察哈爾布爾尼以兵叛佟國綱統大兵鎮宣府夏四月國軒入潮州使何祐奮擊可喜而自帥驍騎繼進大敗可喜於鰲頭山追奔四十餘里斬級二萬因是湖南諸縣皆聞風納降軍聲大振初黃梧降精忠封平湖公而遣黃藍北使梧忽見厲擊頭生瘍死芳度襲公恐精忠誅又降於經封前提督德化公至是聞又有貳志經乃自將南征將道漳州襲執之芳度不納遣弟芳泰走廣東乞援亦以其多反側莫應來嘉與洪福合攻南漳陷穀城輔臣兵陷延安綏德冬十月輔臣與大兵戰固原殺副將太必圖提督陳福逃靈州馬雄等攻陷高雷廉瓊等處十一月芳度將吳淑與其弟潛以城降經入芳度投開元寺府治西北東井中不死出而斬之斲梧桐支解其尸夷黃氏無少長皆死授淑後提督平鹵將軍潛戎旗

一鎮許贊提學葉亨知府守興泉道以陳啓泰拒精忠死故禮葬之十二月寧夏兵變陳福死十五年春正月以畢力克圖鎮寧夏康親王大兵將至精忠將邱飛龍等一百五十餘員就撫經遣劉國軒劉進忠由普寧南路蔡文許貴由大埔程鄉北路會攻惠州三桂兵會攻廣州肇慶二月碣石總兵苗之秀降經授宣毅前鎮滅鹵將軍三月尙之信守其父可喜降三桂鎮南將軍舒恕等引還副都統莽依圖自肇慶突圍走總督金光祖巡撫佟養鉅陳洪明提督嚴白明副將王啓秀等降三桂三桂使之信與經通和經使國軒守惠州進忠守潮州薛進恩吳淑統五將軍會攻江西道汀州襲降精忠將劉應麟以爲前提督奉明伯遂略下會昌瑞金諸縣精忠將馮公輔等陷宜平夏五月黨哈里擊走之六月圖海招王輔臣降

假靖寇將軍立功贖臯精忠將耿繼善及建昌新城諸守者皆燒營遯康親王知精忠爲經所偪遂檄諸將乘機速進秋八月都統賴塔等敗精忠將馬九玉等於衢州復江山九月胡圖等會擊又連敗之復常山賴塔馬哈達等進攻仙霞關降其將金應虎遂復浦城精忠殺范承謨賴塔紀爾他布等克建陽連克建寧精忠將王進功郭炳興降經授進功中提督匡明伯令炳興守長泰冬十月令許耀襲取興化以烏龍江爲界馬成龍朱雲龍朱天貴俱降授成龍援勦左提督靖鹵伯雲龍樓船中鎮天貴水師一鎮康親王師抵延平精忠將耿繼善以城降精忠遣子顯祚納印迎王師至福州精忠率諸文武降還精忠爵如故率所部從征自効遂復溫州處州十一月副都統雅泰總兵許貞敗耿繼善於南豐經遣許耀襲福州

爲都統喇哈達等所敗王師抵烏龍江或勸耀扼將軍山勿使得渡不聽
又請乘半渡擊之不聽既渡耿兵在前滿兵在後并力擊耀耀衆大潰經
令何祐趙得勝拒守興化時吳淑方由汀州進取邵武十二月耿繼善棄
城走守將楊德降授後勁鎮淑兵進攻延平爲副都統穆赫林所敗守將
彭世勳以城降北天大雨雪淑兵利跣足疾走因是敗潰思歸淑遂棄邵
武不守薛進思在汀州將棄城走劉應麟固留且決一戰不聽應麟乃自
殺其妾率妻子奔潮州是月三桂殺孫延齡以其衆隸線國安尙之信遣
人詣簡親王營乞降立功自効舒恕等擊敗嚴自明等於南康

臺灣鄭氏始末卷六

德清沈 雲撰

烏程沈 堯註

十六年春正月大軍抵興化城下祐中敵閒疑得勝有貳使先當敵戰敗祐不敢援得勝歎曰與若共不亡何待乃挽強射數人以死祐率敗軍遯還大軍遂入興化分下汀州建寧泰寧長汀寧化清寧歸化連城會昌新城二月林惟仁守周公源口亦棄營遯大軍攻泉州守將皆遯大軍攻經新泉經以諸將皆中間計無固志遂棄漳州及海澄等十縣遯入廈門三月王移師潮州以莽依圖爲鎮南將軍會勦粵東使姚啓聖說劉進忠苗之秀並以原官從征進忠曰我率諸鎮皆總兵今與若敵其何以率尋以伯爵授進忠討逆將軍進忠遂遣諭惠州陳璉夏四月莽依圖師至南安

嚴自明以城降遂克南雄抵韶州傅宏烈迎降授宏烈廣東巡撫五月尙之信以廣東降六月祖澤清以高雷廉降進忠以潮州降尙可喜卒於軍以子之信襲封平南親王授宏烈撫蠻威烈將軍經會文武議棄烏龍江汀州邵武臯誅薛進思許耀黜進思兄子常霖而以全軍畀國軒總統分遣鎮將守東石深滬日湖丙州諸澳秋七月國軒自惠州攻東莞將趨廣州之信會大兵圍擊大敗之遂克惠州降璉有白頭賊蔡寅者自稱朱三太子常率衆出沒南安同安閒爲經聲援八月三桂分兵攻韶州桂林經遣吳淑會寅據長泰天成寨

縣東南三十餘里

九月提督段應舉夜潛軍襲破之

冬十月啓聖至廈門招經受冊封奉正朔稱臣納貢通商販比島夷例經以箕子未嘗奉周朔辭乃移諸降將東渡劉炎不願東徙聽自就撫去十

二月遣國軒襲泉州爲副都統楊鳳翔提督段應舉所邀不克寅應三桂

攻欽州爲遊擊劉士貴敗遞還韓大任據萬安之梁口應三桂十七年春

正月舒恕等追敗之於鷓鴣寨大任遞汀州二月率所部降國軒潛軍襲

玉洲漳州東四十里三汊河南溪九龍江會合之所福河府東南四十五里下澣諸堡皆下進取石

馬鎮在海澄十五里斷江東橋即虎渡橋跨柳營江上經自將攻泉州爲應黃芳世等禦國

軒參將朱起龍等禦經經佯敗堅壁守而分兵西趨合擊芳世大敗之遂

取平和漳平金光祖自潯進兵莽依圖自平樂接戰爲三桂兵所敗三月

祖澤清聞大兵失利復叛降三桂副都統孟安副將楊壯猷統驍騎援石

馬國軒與戰卻經遣將楊寧會蔡寅屯天寶山而自督諸將急攻泉州安

等還兵圍天寶力戰寧中流矢死寅遂退壁不出閏三月芳世復會兵圍

寅寅軍乏食夜突圍遯安等復偪沿海界外居民徙內地申海禁接濟交通寅乘閒招集得數千人攻安溪時侍講學士李光地以憂居練鄉兵與知縣李鈺計破寅寅蹙降經授前鋒鎮三桂將林興珠詣安親王軍降封列侯授建義將軍芳世會副都統穆赫林攻平和國軒迎擊經遣寅伏灣腰樹而自率奇兵焚其營國軒乘之芳世大潰雜敗卒遯穆赫林遇伏大驚三合圍取無免者經故縱穆赫林五騎亡去乘勝進取潮州都統雅塔里統大軍來援夏四月袁本秀據慶陽應三桂澤清攻電白敗將軍額楚又連敗之克高州與之信戰不利遂棄高州本秀爲大將軍圖海所敗死五月總兵馬三奇攻經潮州段應舉營祖山頭攻國軒前鋒統領希福及穆赫林大軍營海門左右總兵黃藍統重兵駐海澄餉軍爲聲援國軒遣

羸兵嘗應舉而別帥步卒齎火器襲山後應舉軍傷火石死者過半諸軍皆遁守海澄告急請益兵將軍賴塔帥師赴援經會國軒并力圍海澄夜掘濠塹數重通潮水以阻援兵絕餉道遣數百人多燃火執幟僞爲援兵至者藍等統大兵出戰左右伏起橫擊而遙望燃火皆滅以爲援兵盡覆衆大驚爭擁踐入城國軒密遣勇士褫敵衣幟雜逃軍進焚其芻糧積貯火光達旦六月辛未賴塔大軍欲乘尸填濠以渡經鼓諸將乘半濟掩擊又大敗之賴塔遁還泉州壬辰海澄破穆赫林應舉自縊三桂兵克永興都統伯宜理布護軍統領哈克山皆死遂據河外營尙之信移鎮潮州總兵班紹明宋思徵益兵守泉州三桂兵又敗碩岱于郴州經旣克海澄遣祭穆赫林等收其衆三萬餘人入海官軍死者十餘萬人潰者且數十萬

遣吳淑等乘勢取長泰經自將圍漳州不克遂遣國軒攻同安而自撤圍
取南安惠安秋七月國軒遇守將王應奎副將馮昭京拒戰大敗之副都
統雅塔里統大軍來援多火器國軒營輒壁周外深濠窅若爲久計每挑
戰佯敗輒走大軍徑前奮擊而國軒反在大營後鼓噪馳擊已禽應奎走
昭京雅塔里急退不得前隊落濠窅倒戈自亂不能軍乃以數十騎遯兵
仗輜重盡沒南安惠安聞風皆降紀爾他布石調聲來援國軒伏兵徼之
又大潰副都統岳爾多馬思文路遇經將陳諒截戰亦失利遯紀爾他布
等退保興化國軒使人斷洛陽橋泉州東北二十里跨洛陽江上會經將吳正璽圍泉州
岳爾多等復率兵來援堅壁不戰時提督侯襲爵總兵馬三奇守潮州遣
兵來援總督姚啓聖遣總兵林賢潛軍攻克平和八月賢敗樓中鎮蕭琛

於定海

所在連江東北八十里

經遣陳諒拒賢辛未三桂病中風噎隔有犬登其案

而坐病甚口不能張手書永明字庚辰下痢乙酉死馬寶胡國柱立其孫

世璠九月賢兵進攻同安巡撫吳興祚帥標兵赴援攻復永春德化啓聖

會平南將軍賴塔督大兵進攻國軒國軒攻泉益急而蕭琛遣人馳報將

軍喇達哩提督楊捷統滿漢兵興祚帥閩安水師並至衆將士益懼國軒

恐內變遂斷南門二橋遏追兵全軍道南安金雞橋雪嶺抵同安知琛妄

報以告經遂斬琛流其妻子於淡水啓聖等遂入泉州興祚募水師遣賢

統以出海經遣蔡冲凋禦之赤澳大戰卻之興祚因請仍置水師提督以

備水戰大兵遂克同安啓聖以多金賂國軒左右廖璵等令爲之閒而自

督捷等會賴塔圍國軒於蜈蚣山大戰敗之斬四千餘級國軒退據長泰

江東窺漳州冬十月啓聖伏卒深箐中設營壘躬帥捷等挑戰三戰三卻國軒盡銳前進奪取其營捷等佯遯國軒方據營安撫夜半伏卒突起啓聖捷還軍掩擊國軒軍大亂遂乘馬浮水遯鎮將吳正璽等戰死廖璵等及衆一萬二千餘人皆降大軍入長泰國軒旣去江東寨退保三汊河觀音山諸處十一月啓聖修江東杉橋開修來館以招降者與興祚日出金幣縱閒使歸則降禮甘言立請封授無吝色至十八年春正月凡招撫蔡冲琯等及軍士一萬五千餘人援勦左鎮陳諒襲破官兵於定海甲寅國軒攻長泰副都統紀爾他布會興祚夾擊大敗之三月侯襲爵敗楊金日等於山頭仔喇達哩破東石寨陳深戰死夏四月國軒屯玉洲吳淑屯蕭井寨相犄角丁丑夜大雷雨淑爲寨牆壓死國軒馳往慟哭曰是又斷吾

一臂矣五月國軒攻江東橋將軍賴塔統大兵迎戰轉戰及潦窪處國軒
豫布竹籤鐵蒺藜泥淖中而長兵鈎距環偪推引北兵人馬顛蹶不支俘
斬萬餘興祚遣將陳亥來援國軒乘勝連大敗之降亥及其衆八千餘人
而不省其詐也及暮啓聖遣總兵王英統輕騎五千援至時經方聞捷大
喜行人司傅霖諫經夜半子時癸亥晦劉將軍營離方己巳敵乘貪狼將
有大敗速遣黑衣軍三千由乾方進援緩且無及從之經既遣吳潛江勝
前進而降亥之捷再告霖曰殆矣亥佯降將及其名之時而內變也速濟
師爲援而後可施鳳曰劉將軍不勝則降速勝則降遲不始終爲鄭氏也
霖曰救敗如救焚王速出令霖請以全屬任劉將軍無他經乃分四將各
帥精騎伏要害迨進陳亥請國軒願以所部當先自効許之臨敵力戰斬

數十級奔之盡獲其輜重還置營後又使告捷於經霖曰癸亥坤五也是於象爲大有大車以載火器也焚如棄如死如急使者還報無及矣夜半更食將畢火發營後毒燄衝士卒若醉國軒急令將士持餅缶伏面各厲兵速騎而亥所部卒奮起英遏營矢石雨注衆大驚竄國軒帥諸將突圍莫可出忽西北角諷譟震擊益惶急以爲官軍重集也則潛勝曳旗黑盾倭刀背強弩三千人至矣亥衆向之皆披靡國軒遂激衆奮勇鏖戰竟斬亥頭潰西北出潛勝斷後賴塔追奔十數里遇王隆曾瑞等伏兵遯還英收亥散卒并所部得萬餘人追潛勝截戰遇江機援兵橫擊國軒還救圍英大敗之英突圍遯散卒復集得三千餘人奔潰飢敝將曙小休而邱輝闌擊不得退乃與親軍數騎閒道遯去所部皆沒啓聖興祚益縱賂廣閒

略誘經國軒左右十九年春正月祖澤清及子良楨伏誅二月楊來嘉乞
降啓聖會水師提督萬正色出閩安興祚會寧海將軍喇哈達總兵王英
等自同安分三路並進經分命諸鎮將防禦人莫有鬪心乙丑國軒率三
鎮拒海壇正色麾衆大破之國軒力整營壘爲自守計癸酉啓聖會平南
將軍賴塔統水陸軍七道並進守將皆聞風納款丙子水師將軍朱天貴
自海壇遞還勸經速渡臺灣爲上策丁丑國軒遂棄海壇與蘇堪陳昌分
守玉洲石馬海澄天貴守平海嶼經與施鳳守銅山左武衛林陞等分守
湄州南日平山崇武諸嶼江機等分守金廈左右十九寨戊寅平南軍徑
取銅山鳳等思內應執經以獻鳳故經所最親信者傅霖密告經經急執
鳳等誅之然顧左右皆莫測遂棄銅山遞廈門諸將降去同日啓聖抵海

澄堪昌皆開門納降國軒遞廈門見經相持慟哭出啓聖興祚招書先後數十道曰諸將皆如是柰何庚辰康親王帥玉洲等降將爲先道進取金門廈門平南軍還屯潮州辛巳正色破天貴於平海嶼寧海軍分克南日湄州崇武諸嶼壬午經率諸心腹乘艦東渡盡以兩島委國軒天貴甲申王師克雲霄英等破海門三月庚寅朔啓聖督總兵趙得壽黃大來會平南軍分攻灣腰山觀音山展旗等十九寨皆破己亥興祚督王英等會寧海軍進攻廈門五營將軍江機等爭先迎降國軒手刃數人不能止僅與天貴等出戰士卒不用命天貴負重創先遞啓聖會諸軍競進衆益潰叛國軒夜棄廈門退泊遼羅文武千餘員水陸兵數萬出降大軍遂取金門俘獲無算啓聖興祚並敍功予世職啓聖加太子少保興祚擢兩廣總督

夏五月天貴窮蹙乞降啓聖待之有加禮表爲浙江平陽鎮總兵復遣人持書幣招國軒謝使者曰善報熙止努力事事勿復以國軒爲念海水若涸我心則降士爲知己者死國軒受延平兩世信任無有貳參且天下多才何汲汲於二姓臣是貴若天不殄明延平再振國軒敢不束矢操戈追隨熙止以畜嘉貺也六月東渡見經經惘惘病若失政無巨細委馮錫範錫範澄世子也經初娶唐氏妬悍無子妾林氏生男克壑唐嫉謂非經出欲害之經乃秘之他所他妾再生男則又告顯悅以爲私乳媪所生遂構大難幾滅族實則夕御更迭雖經與董夫人莫察也克壑娶陳永華女臺灣新關倚永華綜覽上下晏如經旣西渡克壑監國性精毅諸將嚴憚似成功永華時以寬濟之十數年生養恬謐經得以無東顧憂唐氏死經再

娶錫範女生子克塽兩島既失經東歸憂憤遇事輒暴怒少可似成功當日老成若永華等皆物故錫範因柔佞取媚遂竊柄政擅威福經病迷眊益構煽帷幄閏肺腑大臣皆側目國軒知事不可爲經又無能與語他多新進難深結徒日與左虎衛何祐行人傅霖輩相向歎恨而已二十年春正月經病卒時成功子聰等九人孫克壑弟克舉等十人克塽年十三最幼錫範構諸將及聰等畏克壑嚴以克塽幼懦易與遂白董夫人克壑非經出馳收監國印執幽別室夜拉殺之妻陳氏自縊死遂立克塽稱永曆三十有五年董夫人憂恚成疾夏六月卒錫範封忠誠伯攝行政事畏國軒封武平侯晉鎮國公何祐謀殺錫範不得聞諸將各懷異志啓聖因遣使弔喪陰以多金賂左右使爲閒而密陳規取臺灣事復施琅爲水師提

督以計誘行人傅霖殺之以忠謀鄭氏故也秋七月改萬正色爲陸路提督會琅及將軍總督等進取澎湖及浯嶼遇國軒大戰正色軍先敗遞去

吳潛追至嵩嶼

東海澄

又敗之國軒窘琅於嘉禾幾獲琅而啓聖先在丹霞

降建威後鎮朱友使向導前進援琅琅得跳海門啓聖復爲琅陳請使守水師如故冬十一月大軍平雲南吳世璠自殺戮其尸傳首京師降其將方光琛等二十一年春正月分三桂骸骨於各省梟世璠首級耿精忠劉進忠徐文耀王世瑜白顯忠江元勳曾養性王振邦蔣得軫凌遲梟示巴養元等五人斬梟示夏國相等凌遲精忠子顯祚黃國瑞林芳孫廖庭雲李似桂夏季旻呂應斗武灝司定猷沈偉郭景汾羅萬里祖宏勳陳儀陳斌呂八及提督李本深其孫象乾象坤其弟子濟祥濟民張國柱高起隆

斬決餘交內務府人旗啓聖督水陸軍出定海所風逆回廈門與琅計進
取琅曰海洋呼吸須時攻臺灣宜候寒暑均平西南風便而後可此專責
琅奉公指揮足矣公先伐謀俾其攜貳琅承命一舉掃蕩力耳何煩過計
夏六月國軒大修戰艦繕甲兵錫範笑曰吳耿尙三王皆靡延平乃賴公
獨存國軒曰東寧地什湯武沃壤宜耕穀蔬果實少歉多豐又有糖鹽竹
木之饒交市商舶鹿麝珍禽名材異卉皮甲銅鐵不可勝用練卒百萬繕
艦數千銃礮神器硝磺怪藥不待他求環海依山天限莫入見利則略地
進取沿海皆通無利則堅守力農人人自給幸投天隙以圖霸王舉天下
無足抗耳若夫天命靡常人心鮮固內憂外患交訐洊乘則桀紂富有四
海亡可翹足待也冬十月國軒屯澎湖築礮城十餘所扼諸險隘二十二

年春三月何祐城淡水時啓聖謀自北來襲故備之夏五月琅統舟師集

廈門總兵朱天貴林賢泊銅山六月壬午琅會諸軍奪貓嶼花嶼丙戌屯

八罩嶼啓聖駐廈門督餉國軒在澎湖分左武衛林陞等守雞籠嶼吳潛

援八罩不克死丁亥先鋒遊擊藍理以鳥船先進國軒奮擊盡沒其船禽

理遂擊琅樓船親搏戰射琅中其一目左衝鎮楊德縱琅遂遜天貴以火

器銳奔國軒鏖戰良久天貴中流矢傷腕乃遜戊子琅退屯八罩國軒帥

陳啓明王隆曾瑞江勝分屯虎井

在八罩西八罩在澎湖大山嶼南

桶盤二嶼

雞籠在大山嶼西

嶼南桶盤在西嶼西

而自將攻琅與賢等力戰自辰至午國軒負重創退琅遂麾諸

軍夜進乘風焚殺己丑二嶼盡失庚寅旦琅遣人持書來招且視疾國軒

報曰尊侯仕明遊擊亡歸延平復主逋逃臣事三姓此足下智若轉圜勇

於舍舊捷出尋常萬萬猥欲策駑末步驥塵殷殷意厚敢不拜嘉國軒老矣君存與存君亡與亡若一旦背而他之卒然反噬雖犬馬有不忍爲而謂國軒不犬馬若也詰朝相遇不盡欲言辛卯琅持書幣招錫範及諸守將壬辰啓聖使者又至諸將皆不欲戰國軒曰以功則三桂莫大然以撤藩窘死他皆殲殄唯琅與天貴勵存假以毒我海氛朝以靖兩人夕以誅耳且兩軍殺掠相當勝敗未卜何餒然卽欲投燼若斯願共諸將軍決一死戰以定去就何如皆曰唯命癸巳琅遣戰艦百餘分取雞籠嶼四角山牛心灣而自將大艦五十六居中八十艦居後徑攻澎湖國軒悉衆逆戰乘西北風大起擊沈其大艦數十天貴中礮死日午風反南琅大呼銳進賢繼合攻波濤沸天士皆股栗國軒疾戰不支諸將莫進琅會諸軍圍擊

氣益厲國軒大敗乘走舸從吼門遯楊德先以部衆降陳啓明等四十七鎮將皆死澎湖遂破旬日閒凡喪偏裨三百七十餘人士卒一萬五千餘人戰艦二百餘艘軍械輜重無算琅給降卒衣冠廩餼還招臺灣人衆錫範首倡議降國軒與明宗室王等力不能沮琅方書咨啓聖以臺灣水道紆回且炎酷士卒不耐計俟八月後乘北風行啓聖謂乘勝進擊可旦夕下遂賚功賞銀一萬兩增火器弓弩甚具趣琅進兵兵未發而錫範先遣鄭平英等約以秋七月甲午望日詣降寧靖王術桂自以明宗室義不可辱舉王印授克塽具冠服拜天地二祖列宗率妾袁氏王氏秀姑荷姐梅姐皆死錫範陳夢煒齋降表册印籍土地府庫軍實以獻八月庚戌琅自澎湖進發壬子入鹿耳門抵臺灣曉諭安撫頒赦詔克塽率聰等六人克

舉等八人諸公侯伯以下盡以其屬歸京師其降卒願歸農家聽琅封靖海侯明年設臺灣巡道一知府一知縣三臺灣鳳山諸羅總兵副將各一兵八千澎湖副將一兵二千克塽至京隸漢軍封公爵國軒順清侯天津衛總兵錫範順清伯何祐梧州副將餘各封賞有差後六年以成功受封明室非他僭竊比令與其子經之喪歸葬南安鄭氏自芝龍至克塽凡四世臺灣自成功建國至歸入版圖凡二十三年

聞亭子曰世言鄭氏之先遇異人指一葬地名五馬渡江又傳萬曆中雷震一石有草雞夜鳴長耳大尾凡五十六言以爲鄭氏興亡之讖辭甚俚鄙疑好事者所爲余故不載夫芝龍起於海角糜爛東南受撫之後翦除羣盜其功有足錄者逮援立唐藩擁兵驕恣首鼠兩端王師甫臨反顏歸

命爲臣不忠終被誅戮固其宜也成功生有異徵雖桀犬吠堯而翊戴明室至死不貳易所稱幹父之蠱者豈其人乎瓜州之役嚮使勝國有人出洞庭下江南首尾相應豈易撲滅卽不然而坐據淮揚分兵略地南北之勢忽焉中斷事猶未可知也天命有在旣非知力所能爭旋師海外肇啓東土闢番夷爲郡縣易鱗介爲衣裳勸學屯田規模宏遠求諸史冊幾難數觀昔項羽以蓋世雄才戰無不勝垓下一戰遂至灰滅以成功方之殆未知孰爲優劣矣子經下士禮賢恂恂儒雅而釁生衽席變起蕭牆得國之始亦已多故況復輕信閒諜自殘股肱以致兩島淪沒人心瓦解值耿藩構亂略有數郡爰及末年得不償失延平之業衰焉克塽童稚政在外戚嗣位未幾遂爲俘虜昔紅夷有衆一旅據守安平攻圍期年猶不能克

今澎湖雖破全臺南北固無恙也而旬日之間國祚傾覆傳曰天之棄商
久矣君將興之弗可赦也已其是之謂乎

後跋

臺灣鄭氏始末六卷家閒亭孝廉所著書也余以海島洲嶼名目錯雜相混因取方輿紀要水道提綱一統志等書附註於下以便省閱有譌誤者卽以己意辨之戊戌新秋南江漁父沈垚

臺灣鄭氏始末紀六卷德清沈雲撰烏程沈垚註摭拾詳盡信而有徵足備史家之參攷成功父子闢地海外自保一隅延及三世有明遺老矢志不食周粟者類皆航海東渡往依鄭氏臺灣文化之盛與各行省相埒皆鄭氏先導之功也家厚堂教諭塋於道咸間有傳經堂叢書之刻經子而外旁及史類未葢事而遭亂板毀書目亦不及刊故傳經堂一書外閒絕

少流傳同邑劉子翰怡以表揚前哲爲職志因檢寄傳經堂已刻本十餘種翰怡深賞是書先行付梓慨自甲午一役臺灣爲日所得其地不復隸我版圖讀是編者當益增河山今昔之感云庚申孟秋吳興凌福鏡用臧氏跋

臺灣鄭氏始末六卷沈雲撰沈垚註雲字閒亭德清人道光甲辰進士官廣西興安知縣嘗取閩人江日昇臺灣紀事四十九篇參考他書加以潤色自天啓甲子歲鄭芝龍倡亂至康熙癸亥其曾孫克塽投誠而止子敦又以海島洲嶼名目錯雜相混因取方輿紀要水道提綱一統志等書附註於下以便省閱有譌誤者卽以己意辨之是書於成功江寧一役驕矜

取敗他書不若此本之詳八罩一役藍理重傷此本以爲禽理亦誤蓋首
尾全備瑜多瑕少故重刊之歲在屠維協洽季秋朔霜降日吳興劉承幹
跋